


PAGSAGOP ³

 ...-soong Neville. Maayong buntag, mga magtutuon. Malipayon kaayo kami nga makabalik pag-usab aron pangumostahon na usab kamo pinaagi sa Ngalan ni Ginoong Jesus nga maykasarang-sa-tanan. Nagasalig ko nga nagkaaduna kamo og mahimayaon nga semana sa mga pagdalayeg Kaniya ug mga pagpanalangin.

² Sa pag-abot pa lang nako karong buntaga, natagbo ko dinha ang usa ka batang lalaki ug iya akong gihatagan og usa ka gamay'ng plake mahitungod sa magbalantay nga Manulonda nga nagabantay sa duha ka gamay'ng bata. Ug wala ko kabalo nga mao diay kadto si Daulton, ang batang lalaking Daulton.

³ Ug dinhi pipila na ka semana ang milabay, o pipila na... Mga duha ka semana na ang milabay, dihay usa ka amahan, Cristohanong amahan, nga naghangyo para sa iyang anak nga dalagang babaye nga dili pa niadto Cristohanon, samtang nagatindog siya diha sa linya sa pagpaampo. Ug miingon mismo ang Balaang Espiritu, “Ako—ginahatag Ko kanimo ang imong anak.” Ug ania na niining buntaga ang maong dalaga, nga luwas ug nabautismohan na sa Ngalan ni Ginoong Jesus, nga nagalingkod sa may entablado, sumala gayud sa pagkasulti sa Balaang Espiritu. Ug ania usab ang tanang uban niya nga mga anak. Nasayod ko nga malipayon gyud ang pamilyang Daulton.

⁴ Nakita ko usab dinha ang babaye nga nagpaampo para sa ilang bata niadtong miaging Dominggo, nga gidahum na nga mamatay. Pero nakita ko nga kauban gihapon nato kini karong buntaga, ug malipayon kaayo kami tungod niana, igsoon. Abi nila og dunay muscular dystrophy ang maong bata, pero wala man diay. Busa mapasalamaton gayud kita.

⁵ Nakita ko usab ang tanan natong buutan nga mga higala. Nahinumdom ko niining lalaki dinhi nga miadto kanako usa niadto ka higayon para sa usa ka espesyal nga pagpakighinabi didto—didto sa Chautauqua, nagtoo ko nga didto kadto. Namahaw gani ako uban kanimo ug sa imong asawa ug mga anak, man pud siguro...o ikaw ra ug ang imong asawa, o mga anak, usab diay, oo. [Nagaingon ang igsoong lalaki, “Middletown.”—Ed.] Middletown diay, didto sa...Apan kitang tanan...Nakalimot na man gud ko sa maong ngalan, busa gisulti ko na lang nga sa Chautauqua. Oo, sir. Tungod pud sa kadaghan sa akong buutan nga mga higala.

⁶ Ania pud si Igsoong Charlie Cox ug si Igsoong babayeng Nellie, nga nahimo ko nang ikaduhang panimalay, ug wala na'y lain kondili mora na man gud kamo og akong kaugalingong mga anak. Nagaadto ko didto, tungod didto ko man halos ginagahin

ang akong panahon sa pagrelaks, didtong dapita. Ngani siya ang pinakamaayo nga mangangayam og squirrel sa Kentucky pag anaa ako sa Indiana. Ug busa sa Indiana . . . Ug Charlie, sultihan ta ka gahinam-hinam na gyud ko, daw sa gusto ko na gayud nga mamingwit og pipila ka isdang crappie o striped bass sa dili pa ako magsugod og pangayam. Nabati ko gayud nga daw sa dili na ako makahulat pa niana.

⁷ Si Igsoong Parnell . . . Par- . . . Arnett, nga taga Lou- . . . South Carolina. Ug si Igsoong . . . Bueno, daghan pa kaayo ang mga ania karon nga gikan pa sa nagkadaiyang mga lugar, nga mianhi gyud niining buntaga para duawon kita.

⁸ Kabalo na mo, wala baya kita'y unsa mang regular nga pagpamiyembro dinhi. Kondili aduna lang kita og pagpakig-fellowship sa usa'g usa, samtang ang Dugo ni Jesus Cristo, nga Anak sa Dios, nagalimpyo kanato gikan sa tanang pagkadili-matarung.

⁹ Karon, maanindot ang atong pagtuon, og mahimayaon gayud. Ug kita, tingali ako'y . . . nasayod ko nga nagakalipay ako tungod niini, ug nasayod ko nga kamong tanan nagakalipay usab tungod niini. Usahay pag aduna ko'y sugdan sa tibuok adlaw, aron maghisgot mahitungod niini o mobasa mahitungod niini, moabli ako og duha ka bersekulo ug mosugod na ko sa mga Kasulatan ug, mahibaloan mo na lang, nahuman ko na diay ang Genesis hangtud sa Pinadayag, og nagapadayon sa gihapon.

¹⁰ Ug, kabalo mo, gusto kong mogahin og panahon kon diin mahimo natong—kon diin mahimo natong hisgotan og mahitungod sa Basahon sa—sa Mga Hebreohanon, ug mogahin lang og mga . . . Bueno, pag magsugod na ang panahon sa ting-pangayam og mga squirrel, siguro sa Septyem- . . . mga Okt- . . . Agosto, kabalo na mo, ug padayonon hangtud sa higayon nga moadto na sa ubang nasud, og matag gabii lang para sa paghisgot bahin sa Basahon sa Mga Hebreohanon, o sa Basahon sa Exodo. Kung unsa nga ang Dios, diha sa Exodo, gipahigawas Niya ang Iyang mga katawohan gikan sa Egipto, sa usa ka exodo! Pagkaanindot kaayo nga tipo kanato sa karon nga nagaandam na para sa atong exodo. Kini'y, oh, pagkaanindot gayud niini. Ingon nga nagatakdo ang tibuok Kasulatan, ug usa gayud kini ka daku nga Estorya.

¹¹ Bueno, karong buntaga, anaa pa gihapon kita—kita sa Basahon sa . . . Atong pagahisgotan ang unang tulo ka kapitulo sa—sa Basahon sa Mga Taga-Efeso. Ang sulat ni Pablo ngadto sa Mga Taga-Efeso sa Efeso, nga gapaninguhang, ihan-ay ang iglesia sumala sa hustong pagkapuwesto niini. Ug sa dili pa kita maghisgot niini, mahimo nga mogahin una kita og usa pa ka gutlo o duha alang sa pag-ampo, sa dili pa kita magsugod.

¹² Oh Ginoo, nga among Dios, nagaduol kami sa Imong Presensiya karon, ingon nga kami'y dili-takus, apan nasayod

kami nga adunay Halad nga Dugo nga nagahulat didto, nga nagalimpyo kanamo sa tanang kahugawan, ug ginapresentar kami sa atubangan sa Amahan, nga walay-ikasaway, og walay-buling. Walay bisan unsa man nga mahimo namong buhaton para mamahimong takus niini. Apan tungod kay gibuhat na kini ni Jesus para kanamo, mapainubsanon kaming nagayukbo sa Iyang Presensiya ug sa Iyang Ngalan, nagapangamuyo nga ipadala Mo ang Balaang Espiritu sa among taliwala niining buntaga. Ug ingon nga dili ako usa ka teologo o dili kabalo kung unsaon sa paghan-ay ang Kasulatan, apan nadasig lang gyud ug mapasalamaton tungod nga mabati ko ang Balaang Espiritu sa diha nga nagalihok Kini sa akong tibuok pagkatawo, hinaut nga panalanginan kaming tanan Niini sa diha nga magabasa kami sa Imong sinulat nga Pulong, aron mamahimo Kining Kinabuhing Walay Katapusan nganhi kanamo. Itugot kini, Amahan. Amo kining ginapangamuyo sa Ngalan ni Jesus ug alang kang Jesus. Amen.

13 Karon buut kong isulti dinhi, una, nga kung sa unsa mang higayon nga adunay butang nga akong masulti nga dili n'yo mauyonan, nga wala nahuyon, tingali'g sayup gayud sumala sa inyong pagtulon-an, o kaha usa ka butang nga dili ninyo mahimong uyonan, nagasalig ako sa Balaang Espiritu, nga himoon Niya kining ingon ka malulot ug ingon ka malumo hangtud nga wala na'y...nga dili gayud makapasakit. Kita n'yo? Ingon nga kini'y—kini'y pinasikad gyud sa gugma ug pagpakig-fellowship, ingon niana mismo kini...Sa ingon niana nga paagi kini gituyo.

14 Ug nagsugod kining tanan sa wali niadtong miaging Dominggo, nagatoo ko nga sa, miaging Dominggo sa buntag kadto, ang bahin sa *Ang Sinalikway Nga Hari*. Aduna na ba'y nakakuha og sa maong teyp? Sa hunahuna ko aduna na sila niana, ug mahimo na kamong makakuha pud niana kung gusto n'yo nianang, *Ang Sinalikway Nga Hari*.

15 Bueno pipila na lang ka adlaw ug magsugod na kita sa...didto sa Middletown, Ohio. Buut namo nga ang tanan nga nakaplano na sa ilang—ilang mga pagbakasyon nianang higayona siguradoha n'yo nga magkita-kita kita didto, tungod kay nagalaum gyud kita og usa ka halangdon nga higayon sa pagpakig-fellowship didto sa Middletown, Ohio. Si Doktor Sullivan man siguro, ang tigpangulo, sa komite. Ug dunay lima ka gabii para niana, magawali ako didto ingon nga—nga dinapit nga magwawali sa International Convention sa Interdenominational nga iglesia. Ug dayon—dayon human niana, mao na ang sa atoa mismo nga panagtigum inig gikan didto. Nahilandam na nato kana hangtud sa ika-dose, apan may pagsabot-sabot na nga mahimo pud natong ipadayon kana bisan hangtud sa sunod na usab ka semana pagkahuman niana, nagadepende lang gihapon sa kung unsa ang pagpanguna sa

Balaang Espiritu. Gusto natong tanan nga mapangunahan gyud tà sa Espiritu; basta kung unsa ma'y ginasulti sa Espiritu nga buhaton, buhaton nato mismo kini sa gilayon.

¹⁶ Ug atong hinumduman nga samtang ginatuman nato ang Espiritu, dunay usa ka halangdong leksyon nga kinahanglan natong makat-onan, mao ang dili tà angay'ng magmadalidalion. Kita n'yo, ayaw mo pagdali, kondili magmaaduna lang og pagtoo. Kung nangayo man kita sa Dios og bisan unsa, nan hinumdumi n'yo nga nagatubag ang Dios og pagampo. Ginatubag Niya kana sumala sa Iyang panahon, og sa pinakamaayo nga paagi, nga ginabuhat kana nga tukma gayud para kanato. Ug kung dili man, nan unsa ba'y atong ginabuhat dinhi karong buntaga? Para sa unsa—unsa ba nga nanag-angkon kita og pagka-Cristohanon? Ang Dios... Kung dili kini ang Pulong sa Dios, nan dili diay Kini tinuod, og kung ingon niana man kita na gyud ang pinaka makaluluoy nga mga tawo.

¹⁷ Pero malipayon gayud ako nga makighiusa sa mga kasingkasing sa kadaghanan dinhi nga nasayod nga Kini mao ang dili-masayup nga Pulong sa Dios. Kung ingon niana Kini, ang matag Pulong Niini mao gayud ang Kamatuoran, ang matag Pulong Niini, ang matag bahin Niini. Ug tungod sa grasya sa Dios, nagkaaduna ko og pribilihiyo nga makita ang maong Yuta nga atong pagaadtoan sa umaabot nga adlaw.

¹⁸ Kagahapon (Ang mga tawo wala gayud mahibalo kung unsa ka kasubo nga mga panahon ang nagaabot pagmaanaa ka sa ingon niini nga matang sa ministerio.), naguol gyud ko og ayo, ug giingnan ko ang akong asawa, “Unta motaliwan na lang ko.”

Ingon siya, “Nganong nakasulti man ka niana, Bill?”

Ingon ko, “Oh, dinhi man gud aduna ko'y mga problema ug mga ingon-anang butang.”

¹⁹ Ug pagkahuman daw sa miingon ang Balaang Espiritu, “Gapaninguha ka bang laktawan ang mga ingon niini? Imo bang—ginasulayan mo bang likayan ang mga niini?” Kita n'yo?

²⁰ “Dili,” ingon ko, “pero patindoga lamang ako nga walay sapayan niining tanan ug atubangon ko kini.” Kita n'yo, basta... Kita n'yo?

²¹ Pero mas maayo gyud Didto. Sa tinuod lang, sa tinuod gayud, ginasulti ko kini ingon nga saksi mismo, nga human nga matapos na kining kinabuhia, magasulod kita sa usa ka Yuta nga labaw pa sa unsa mang butang nga mahunahuna ni kinsa man. Ug kung aduna ma'y mga estranyo nga ania karon, nagasalig ko nga wala kamo... ginaampo ko sa Dios nga wala unta kamo naghunahuna kanako ingon nga usa ka panatiko. Ako—gusto ko, kung unsa man, nga magmatinuuron ug isulti gayud ang Kamatuoran. Tungod unsa man pu'y kaayohan nga mahatag kanako kon mosulti ko og usa ka butang nga sayup, sa dihang

aduna—aduna man unta og daghan kaayo nga Kamatuoran nga ania niini? Kita, nganong kinahanglan pa man natong mosulti og sayup mahitungod niini? Kita n'yo? Kini, Kamatuoran man gayud Kini.

²² Ug, dili ikatingala, nagatoo ko nga gilalin kaniadto si Pablo paingon sa ikatulong langit, ug nakita niya ang mga butang nga dili niya angay'ng ipanulti. Ug usa niadto ka adlaw siya miingon, “Wala makita sa mata, wala hidunggi sa dalunggan, ni misantop sa kasingkasing sa tawo, kung unsa ang (gikatagana na) sa Dios alang kanila nga nahigugma Kaniya.”

²³ Oh, nagakinabuhi gayud kita . . . Nagakinabuhi kita sa usa ka basurahan dinhi, kana lang, sa usa mismo ka tipun-og nga mga basura nga puno sa—sa mabaga nga aso gikan sa mga basura. Nga . . . Bisan pa kung dili kita kontaminado niini mismo, pero nagapuyo man tà dinhi niini, kon diin nagagikan ang aso sa nagabaga nga sala. Ngani ang usa sa pinakamakapasuka nga mga butang nga akong mahunahuna, mao ang usa ka nagakasunog nga basurahan sa siyudad. Nakaduol na ba mo niana? Nianang luod kaayo, og kontaminado nga baho sa aso nga nagagikan sa tanang matang sa hugaw. Ug—ug kon makahanggab ka gani niana, nan mora gyud ka og malipong.

²⁴ Nahinumdum hinoon ko kaniadtong kinahanglan kong moadto sa New Albany, didto sa . . . ubos sa may Eighteenth Street, kon diin didto napahimutang ang basurahan kaniadto, ug kinahanglan ko man nga mangolekta didto ug mobasa sa mga metrohan. Ug makuyawan gyud ko niadtong higayona pag didto na, sa rota sa dalang eighteen, pag kinahanglan ko nang moagi didto, tungod kay makahanggab na man sàb ko niadtong makapasuka nga baho. Ug gawas pa niana, atua usab didto ang mga patay'ng lawas sa mga ilaga ug mga iro ug tanan na, kabalo na mo, nga nagakasunog didto ug kadtong mabaho nga aso nga nagagikan didto.

²⁵ Pero, bisan pa man, dinha maitandi kining kinabuhia, bisan pa sa pinakamaayo niini. Usa mismo ka nagakasunog, og nangalisbo nga sala sa bisan asa na lang, mao gyud, sa espirituhanon nga pagkasulti. Apan, oh, may dapit kon diin ang hangin nga nagaharugos limpyo, ug ang tanan-tanan pagkamaanindot ug may pakigdait ug kalipay ug Kinabuhing Walay Katapusan, didto kini mismo sa tabok sa suba. Apan anaa pa man tà sa pakiggubat, mao nga dili kita angay'ng magrelaks-relaks lang ug moingon, “Magdali tà ug motabok na didto,” kondili ubanon gyud nato ang matag usa nga madala nato. Oo.

²⁶ Ug karon ang katuyoan niini nga mga pagtuon mao ang ipa-angkla kadtong mga nakatabok na sa Yuta. Ang katuyoan niini, sa pagtuon nato niining Basahon sa Mga Taga-Efeso, mao ang pagpahimutang sa iglesia sumala sa hustong pagkapuwesto kon

asa kini bug-os nga nagabarug diha kang Cristo. Usa kini ka tipo sa Daang Tugon ug sa Basahon ni Josue, kon diin nang-apod-apod kaniadto si Josue. Nahisgotan na nato kini niadtong miaging Domingo, diin gipang-apod-apod ni Josue ang yuta ngadto sa matag tawo. Ug gipang-apod-apod niya kadto nga may pagdihog.

27 Kon daw sa unsa nga si Moises . . . gidala ang mga tawo pagawas sa Egipto, nga may dala nga mga ahos, og sibuyas, paggawas nila, ug gihatagan og usa ka dapit nga gikasaad na sa Dios upat ka gatus ka tuig human niadto . . . o upat ka gatus ka tuig diay sa wala pa kadto, nga dalhon Niya sila ngadto sa usa ka dapit, sa usa ka maayong yuta nga nagapaagay og gatas ug dugos. Ug gipangunahan ni Moises ang mga anak sa Israel paingon mismo sa maong yuta, apan wala niya sila napatabok.

28 Ug si Jesus, alang ngadto sa mga espirituhanon, alang ngadto sa mga tawo nga . . . ingon nga gisaaran kita og usa ka Balaang Espiritu sukad pa sa sinugdan, gipangunahan sàb kita ni Jesus paingon sa maong saad. Apan miabot ang Balaang Espiritu, sama ni Josue, aron mangulo ug manguna ug maggiya ug aron panag-iyahon ang yuta, o panag-iyahon ang iglesia. Nahibaloan nato, sa tinuod lang, kung ingon-niana, nga sa atong . . .

29 Bueno dinhi, tingali, nagahunahuna ang mga tawo nga ako walay tahod kono nga gapaningkamot nga balewalaon ang mga kaigsoonan. Dili gyud! Ang Dios mao'y akong Maghuhukom, dili gyud ko ingon niana. Kita n'yo? Ginapaningkamotan ko lamang nga ipakita ang usa ka butang nga mao ang Kamatuoran. Kita n'yo? Pero nagpili na man hinoon tà og mga tigpanguna, nga iya sa tawo, imbis nga ang pagpanguna, mga tigpanguna, mga pagpanguna sa Balaang Espiritu. Gusto nato og tawo ang mao'y moapod-apod sa atong bahin ug mao'y manguna kanato, mga denominasyon nga sama sa Methodist, Baptist, Presbyterian, Lutheran, Church of Christ, Pentecostal, ug nagkalainlain pang mga denominasyon, ang magtukod og usa ka organisasyon ingon nga usa ka ehemplo, ug ginasunod pud nato kana. Apan kita unta . . .

30 Wala gayud bisan asa sa Biblia nga kinahanglan natong buhaton ang ingon niana. Wala pu'y ni usa ka teksto sa Kasulatan, sa tibuok Biblia sa Dios, kon diin may giorganisa Siya nga iglesia sukad-sukad o kaha naghigot Siya bahin sa usa ka organisasyon, wala gyud ni usa ka bahin sa Biblia. Kondili kanunay gayud nga batok niini. Ayaw Niya nga mahiangay kita sa mga butang nga iya sa kalibutan. Ang gusto Niya nga mamahimo kitang mga talagsaon, og gipahilain.

31 Pero wala ko ginapasabot ha nga mamahimong “hangal,” sama sa tawag nato niini. Ang buut kong ipasabot nga mamahimong usa ka tinawag-pagawas nga mga tawo, oh, usa ka gipanalanginang balaan nga nasud, nga mga nagakinabuhi

og kinabuhi nga dili masalawayon, nagapanglihok, og nagminatarung sa atong mga kaugalingon sama Kaniya, nga nagapamuhat nganhi kanato, kay kita Iya mang mga binuhat, hinimo diha kang Cristo Jesus alang sa mga maayong binuhatan.

³² Bueno, niadtong Miyerkules sa gabii diay, daghan man kaninyo ang wala dinhi niadtong Miyerkules sa gabii, ug nakadangat na kami sa... nagtoo ko nga sa ika-3 na nga bersekulo kadto o sa... Dili, sa ika-5 nga bersekulo na diay.

... *ngadto sa pagkasinagop*, o ang pagpahimutang sa mga tawo...

³³ Kung unsa nga ginapaningkamotan sa Dios, nga ipahimutang sa hustong pagkapuwesto ang Iyang katawohan, ug dayon sa diha nga naipuwesto na ang usa, oh, gusto usab sa tibuok iglesia nga mamahimong sama nianang usa, magkaaduna pud og mao ra nga matang sa mga butang, mobuhat og mao gihapong mga butang. Lahi-lahi baya ang pagkulit kanato, lahi-lahi ang pagkahimo kanato, lahi-lahi ang atong kinaiya, ug lahi-lahi sàb ang pagkapuwesto kanato, ang matag usa para sa managlahi pud nga buluhaton; ang usa tingali para sa usa ka gamay lang nga matang sa buluhaton, ang usa usab para sa usa ka dakung buluhaton. Nagtoo ko nga si David kadto o kaha usa sa mga propeta, nalimtan ko na man gud karon, ang miingon, “Palabihon ko pa nga mamahimong trapo sa Balay sa Ginoo, kaysa mamahimong... magpuyo sa mga balong-balong kauban ang mga daut-... ang mga dautan.”

³⁴ Karon mohunong sà tà sa makadiyut lang bahin sa pagsagop, diha sa ika-5 nga bersekulo, sa pagpaninguha nga masabtan gayud ang bahin niini kutob sa mahimo nato. Apan karon hinumdumi n’yo ang tema, nga mahitungod kining tanan sa pagpahimutang diha sa atong hustong puwesto. Pila man ang nakasabot niana? Paminawon tà nga isulti n’yo kini sa usa ka pulong: “Pagpahimutang sa Lawas ni Jesus Cristo sumala sa hustong pagkapuwesto diha kang Cristo kon diin ang Balaang Espiritu ang nagapanguna kanato.” Ingon niana, karon nasabtan na nato kini, kita n’yo. Ang pagpahimutang kanato, ang Basahon sa Mga Taga-Efeso ang magabuhat niana.

³⁵ Ug matikdi n’yo kining batid nga magtutudlo, si Pablo. Ang unang butang nga gibuhat niya mao ang pagmakmak sa tanang ideya mahitungod sa pagtipas. Gimakmak ang tanang ideya bahin sa “pagka-Cristohanon karong adlaw ug pagkaugma nahisalaag na ako, ug pagkasunod adlaw gikondena ako sa Dios ug pagkasunod adlaw na pud nahibalik na ako.” Binuang kana! Karon kini’y... Kini nga Basahon wala nakapahinungod sa pang-ebanghelyo nga pagpanudlo, kun sa mga wali sa mga ebanghelistas. Wala nato... Ngani dili man nako ginahisgotan kini pag anaa ako sa natad sa pagpangmisyon. Ginapahayag ko lang kini sa iglesia, tungod nga gipahinungod man kini ni Pablo

ngadto sa mga balaan, kadtong mga tinawag ug ginatipigan, ug mga napuno ug mga gipahilain na, ug nga anaa na sa Balaang Espiritu, mga anaa na sa Yuta sa Canaan. Gipaningkamotan niyang isulti kanila, ang unang butang, wagtanga n'yo sa inyong hunahuna nga mangalaglag kamo ug nga buhaton n'yo ang *ingon-ani*, ug nangahadlok kamo sa *ingon-ani*. Ayaw kamo'g kahadlok sa unsa pa man, tungod kay gipaningkamotan gyud niyang isulti kaninyo sa kon asa kamo, kung kinsa gayud kamo, og kung unsa ang inyong ginabarugan.

³⁶ Bueno, mahimong makabuhat kamo og mga butang nga sayup, ug sa matag higayon nga makabuhat kamo og unsa man nga sayup nan pagabayaran pud ninyo kini. Oo, sir, tungod pagaanohon mo man ang imong gipugas! Pero wala kana'y kahilambigitan ni usa ka butang sa inyong kaluwasan. Tungod sa dihang natawo kamo sa Espiritu sa Dios, aduna na kamo'y Kinabuhing Walay Katapusan ug dili na mahimong mamatay maingon man usab nga ang Dios dili mamatay. Kabahin kamo sa Dios, anak kamo sa Dios.

³⁷ Ngani natawo ako ingon nga usa ka Branham. Mahimong hatagan n'yo ako ug ubang apelyido. Bisan ang ubang apelyido dili man makapahimong gamay kanako, Branham gyud gihapon ako. Tungod natawo man ko ingon nga Branham, og kanunay na gayud akong Branham. Ako'y . . . mahimong bug-os man ako nga mamahimo nang kibag sa umaabot nga adlaw, tungod sa arthritis, o kaha madisgrasya ug mahimo nang baldado hangtud nga mora na ako og usa ka mananap, apan magapabilin gihapon akong Branham! Ngano man? Tungod dugong Branham man ang anaa sa kinasuloran ko.

³⁸ Ingon niana pud kamo. Ug basta gihimo kamo sa Dios nga . . . Karon timan-i n'yo, nga wala ako nagapakigsulti niadtong mga anaa sa gawas kang Cristo. Kondili nagapakigsulti ako niadtong mga anaa na kang Cristo. Unsaon ba ninyo pagpakasulod diha kang Cristo? "Pinaagi sa usa ka Espiritu!" Dakung E-s-p-i-r- . . . nga nagakahulogan og, "Pinaagi sa usa ka Balaang Espiritu kitang tanang gibautismohan pasulod ngadto sa usa ka Lawas." Unsaon man nato . . . Unsaon man nato pagpakasulod? Pinaagi ba sa bautismo sa tubig? Mao nga supak gayud ako kaninyo nga mga Baptist ug kaninyo nga mga Church of Christ. Tungod dili man pinaagi sa bautismo sa tubig, dili gayud! Unang Mga Taga-Corinto 12, miingon, "Pinaagi sa usa ka Espiritu, Balaang Espiritu, gidala kita pasulod ngadto niana nga Lawas." Ug luwas gayud maingon nga luwas kana nga Lawas. Ang Dios mao'y . . . nagsaad niini.

³⁹ Unsaon man sa Dios sa paghukom Kaniya pag-usab, sa dihang miadto na man Siya sa Kalbaryo? Ngani sa pagtungas Niya didto sa Golgota, gibunalan Siya, napangos, og dili Siya makapang-ayo, dili gani Siya makasulti ni usa ka pulong, halos. Tungod ngano man? Giako man Niya ang mga sala sa kalibutan.

Dili tungod nga makasasala Siya, kondili “Siya’y nahimong sala” para kanako ug para kaninyo. Ang tanang mga sala sa kalibutan gikan pa sa kang Adan hangtud sa Iyang Paganhi, Iyang gipas-an. Ug dili ingon nga gisilotan sa Dios ang Iyang Anak. Kondili ang sala mismo ang Iyang gisilotan. Kita n’yo kung unsa kadto ka grabe? Tungod naghimo man Siya og halad-pasig-uli. Nagbuhat Siya og paagi sa paglingkawas alang sa tanan niadtong hingsayran na sa Dios, pinaagi sa Iyang pagkahibalo-nang-daan, nga managpanuol. Moabot ra kita dinha sa pipila ka minuto.

⁴⁰ Karon, kung ingon niana, sa diha nga kamo “pinaagi sa usa ka Espiritu kita gibautismohan pasulod ngadto niana nga Lawas, usa ka Lawas, nga mao si Cristo,” nan luwas na kita hangtud sa kahangturan.

⁴¹ Bueno, daw sa talagsaon nga may kalabutan kini ilabina, sa—sa—sa mga magtotoo sa doktrinang Arminian, nga sila kono... kinahanglang adunay butang nga pagabuhaton para mamahimong takus sa ilang kaugalingon, o usa ka butang nga magpahitakus. Pero unsaon man niini pagkahitabo pinaagi sa duha ka butang sa mao rang higayon? Mahimo ra kining pinaagi sa grasya o kaha pinaagi ra sa maayong mga buhat, usa ra. Dili gyud mamahimo nga pinaagi sa mao rang butang, o pinaagi sa duha ka managlahi nga butang; kondili kinahanglang pinaagi sa usa ra gayud. Kini’y... .

⁴² Ngani ako, aba, wala na gayud ako’y unsa pa man nga makita kondili pinaagi lamang sa grasya sa Dios. Mao kana kung unsa ako. Dugay na akong nagatoo sa grasya. Ako’y bug-os gayud nga pinaagi lamang sa grasya, kana lang. Dili ingon nga ako—ako... . bisan sa kinabuhi ko, niadtong batan-on pa ako, wala gyud ko’y unsa man nga hingkit-an, gawas lamang sa grasya, grasya. Ginaingon nila, “Ako—ako’y... . Katola ang akong likod ug katolon ko usab ang imong likod.” Bueno, usa kana ka dili-maayo nga sinultihan. Tungod dili ko man igsapayan kung katolon mo man ang akong likod o dili, kung kinahanglan man nga katolon ang imong likod, nan katolon ko kana bisan pa man. Kita n’yo, ingon-ana sàb ang grasya. Oo, sir. Kita n’yo, nagapamuhat ang grasya pinaagi sa gugma. Kung nagkinahanglan ka niini! Bisan pa kung wala ka’y nabuhat nga unsa mang butang para kanako, ako—wala man ko’y kahilambigitan ni usa ka butang kanimo, kung nagkinahanglan ka niini buhaton ko gayud kini bisan pa man. Ingon-ana ang grasya! Tungod kay nagkinahanglan ka man niini!

⁴³ Nagkinahanglan sàb ako og pagluwas. Walay laing makaluwas kanako. Wala ko’y unsa man nga mahimo sa akong kaugalingon, dili ko gayud mahimong luwas ang akong kaugalingon. Mao nga nagkinahanglan ako og pagluwas, tungod kay nagatoo man ako sa usa ka Dios. Ug gipadala sa Dios ang Iyang Anak, nga nagpakahisama sa makasasala nga unod, aron

mag-antus nga puli kanako, ug naluwas ako, pinaagi lamang sa grasya nga ako naluwas. Wala ni usa man ka butang nga mahimo kong buhaton, o mahimo ninyo, aron luwason ang inyong kaugalingon. Ug kadtong Iyang mga giila-nang-daan sa wala pa ang pagkatukod sa kalibutan. . .

⁴⁴ Nahisgotan na nato kini, niadtong miaging Miyerkules. Ngani atong gihulagway ang Dios diha sa Iyang pagka-Elah, Elohim, ug gipakita nga Siya kaniadto nagalungtad-nga-nag-inusara. Apan sa sulod Niya anaa ang pagka-Amahan, sa sulod Niya dunay nagkalainlaing mga kinaiyahan, ingon nga usa ka Manluluwas, og ingon nga usa ka Mananambal. Anaa kana tanan sa Dios, ug ang Dios kaniadto nagalungtad-nga-inusara. Apan ingon nga usa Siya ka Manluluwas, Siya mao ang Am- . . . Siya wala pa'y Anghel kaniadto, Siya wala pa'y unsa man kaniadto. Wala gayu'y bisan unsa man kaniadto gawas lamang Kaniya. Siya nagalungtad-nga-nag-inusara. Wala na'y uban pa nga buhi kaniadto gawas lamang sa Dios.

⁴⁵ Apan ingon nga Siya'y Dios, kung ingon-ana kinahanglan aduna gayu'y magasimba Kaniya, tungod kay nagtinguha man Siya og pagsimba. Ug mao nga naglalang ang Kaugalingon Niya Mismo og mga linalang nga mosimba Kaniya. Karon, sa makadiyut lang, ato kining lakbitan pag-usab, sa makadiyut lang ha, pero dili na nato hisgotan ang tibuok butang, tungod makuha man ninyo kini sa teyp. Ug dayon tungod kay Dios man Siya, nagbuhat Siya og mga Anghel, ug gisimba Siya sa mga Anghel. Hangtud karon ginasimba gihapon Siya sa mga Anghel. Aba, ang mga Anghel bitaw nga nagatindog sa Presensiya sa Dios adunay unom, ka pares nga mga pako, unom ka mga pako. Dunay duha nga nakatabon sa Ilang nawong, duha pud ang nakatabon sa Ilang mga tiil, ug duha pud ang gamit nila sa paglupad-lupad, diha sa Iyang Presensiya, nga nagatuaw sa adlaw ug gabii, "Balaan, balaan, balaan, ang Ginoong Dios nga Makagagahum-sa-tanan." Mao kana ang ginaingon sa Kasulatan. Ilang gisimba Siya, busa aduna gayu'y butang nga gilalang aron dunay mosimba Kaniya.

⁴⁶ Dayon sa sulod Niya dunay usa ka kinaiyahan sa pagka-Manluluwas. Pero unsaon man sa usa niadto nga mga Linalang, sa unsa mang paagi nga mahisalaag ang usa Kanila, nga wala ma'y sala o mga hunahuna sa sala? Dili gyud kana mamahimo. Busa gikinahanglan ùna nga adunay pagalalangon nga mahimong mahisalaag, aron mamahimo Siya nga Manluluwas. Sa sulod Niya anaa pud ang pagka-Mananambal. Nagatoo ba kamo nga usa Siya ka Manluluwas? Nagatoo ba kamo nga usa Siya ka Mananambal? Pero unsaon man kung walay bisan unsa aron pagaluwason o pagaayohon? Kita n'yo, mao nga kinahanglan aduna gayu'y pagalalangon nga ingon niana.

⁴⁷ Bueno, pero wala Niya kadto buhata nga ingon niadto, kondili gipahimutang Niya hinoon ang tawo nga may gawasnon

nga kinaugalingong kabubut-on, “Kung pilion mo *kini* mabuhi ka, pero kung pilion mo *kana* nan mamatay ka.” Ug hangtud karon ang matag tawo nga mahimugso sa kalibutan ginapahimutang gihapon sa mao ra nga pagpili. Tungod ang Dios, pinaagi sa Iyang pagkahibalo-nang-daan, nasayod na man kung kinsa ang maluwas ug kung kinsa ang dili. Kung ang Dios ingon nga . . .

⁴⁸ Kagahapon gipangutana nganhi kanako ang maong pangutana, sa usa ka teologo, nga dugay nang nagatambong sa mga panagtigum o nagapaminaw sa teyp, ang ingon, “Usa ka pangutana!” Ingon siya, “Kung ingon-ana ang Dios ba anaa-sa-tanang-dapit? Kung ingon-ana,” ingon siya, “Mahimo diay Siya nga maanaa sa bisan asa?”

⁴⁹ Ingon ko, “Dili Siya anaa-sa-tanang-dapit sa literal nga ginapahinungod sa pulong nga anaa-sa-tanang-dapit. Dili man Siya puede nga mamahimong usa ka Persona ug dayon mamahimong anaa-sa-tanang-dapit. Kung Siya’y anaa-sa-tanang-dapit, nganong nagaampo pa man ka para sa Balaang Espiritu? Kung Siya’y anaa-sa-tanang-dapit, nan anaa unta Siya sa matag siak, suok, lungag, sa matag selula, kaugatan, og tanan nang uban pa.” Ingon ko, “Nganong gipangita pa man Niya si Moises kaniadto, kung Siya ma’y anaa-sa-tanang-dapit, didto sa katapusan? Nganong nagalakaw-lakaw man Siya didto sa tanaman sa Eden, nga nagasinggit, ‘Adan, Adan, hain ka man?’ kung Siya’y anaa-sa-tanang-dapit?”

⁵⁰ Siya’y anaa-sa-tanang-dapit tungod kay Siya nahibalo man sa tanan. Nahibalo Siya sa tanang butang tungod kay Siya wala ma’y kinutoban, ang pagkawalay-kinutoban ang nagapahimo Kaniya nga maanaa-sa-tanang-dapit. Ingon nga anaa-sa-tanang-dapit, dayon, ingon nga walay-kinutoban, nan, anaa Siya sa Kalangitan. Nagapabilin Siya sa usa ka dapit tungod usa man Siya ka Persona.

⁵¹ Ug, ingon nga walay-kinutoban, nan nahibalo Siya sa tanang butang. Siya nasayod sa matag higayon nga mamilok ang tagnok. Iyang hingsayran pud ang matag putyokan, kon diin nagasulod kini sa balay niini aron magkuha og dugos. Nasayod pud Siya sa matag maya nga nagatugdon sa kahoy. Nasayod gayud Siya sa matag panghunahuna nga anaa sa inyong hunahuna, tungod kay Siya wala ma’y kinutoban ug nahibalo sa tanan. Mao nga, dili lamang Siya ingon nga walay-kinutoban, Siya’y nahibalo usab sa tanan, nahibalo Siya sa tanang butang. Apan usa Siya ka Persona, ang Dios usa ka Persona, ug gikan niini nga Persona misugod sa pagtungha ang mga niini.

⁵² Ug ang sala, sa gikaingon ko na niadtong miaging gabii, ang sala dili man usa ka binuhat. Walay unsa mang butang nga gilalang kondili kahingpitan lamang. Gilalang sa Dios ang tanang butang nga maayo. Mao nga ang sala dili usa ka binuhat.

Dunay miingon, “Bueno, mao kana ang mismong paglalang sa sala.” Nadungog n’yo na kana. Apan sayup gyud kana. Ang sala . . . Aduna ma’y usa lang ka Magbubuhay, kana mao ang Dios. Pero ang Dios dili makalalang og sala, tungod kay balaan man Siya ug wala gyu’y bisan unsa diha Kaniya para lalangon kana. Pagtuis lang ang sala; dili ingon nga binuhay, kondili pagtuis lang kini. Ngani ang pagpanapaw mao man ang matarung nga buhat nga gituis lang. Ang bakak mao ang kamatuoran nga gisayup lang og sulti. Ang unsa man nga sala, bisan unsa nga sala mao gayud ang pagkamatarung nga gituis lang.

⁵³ Busa karon, nagapanghan-ay ang Dios. Gipadayag na Niya ang Iyang Kaugalingon, nga Siya’y Dios. Gipadayag na Niya ang Iyang Kaugalingon ingon nga usa ka Manluluwas, nahisalaag ang tawo ug giluwes Niya ang mga niini. Gipadayag na Niya ang Iyang Kaugalingon ingon nga usa ka Mananambal. Walay unsa man nga kalahian kung unsa man Siya sumala sa ginasulti sa mga tawo; tungod Siya mao gayud, mao ra sa gihapon, bisan pa man. Usa Siya ka Mananambal, usa pud Siya ka Manluluwas, Siya’y Dios, og Siya’y Eternal. Ug aduna Siya’y katuyoan. Ug ang Iyang katuyoan, sa sinugdan pa lang, mao ang magbuhay og mga linalang nga mohigugma Kaniya ug mosimba Kaniya.

⁵⁴ Ug tuod man nagbuhay Siya og mga linalang, ug nahulog ang maong mga linalang. Ug dayon ang Dios, pinaagi sa Iyang pagkawalay-kinutoban, mitan-aw Siya sa agi sa panahon ug nakita ang matag tawo nga mamaluwas. Ang matag tawo, naila na Niya kini pinaagi sa pagka- . . . pinaagi sa pagkahibalo-nang-daan. Busa kung Siya nahibalo na, pinaagi sa pagkahibalo-nang-daan, kung kinsa ang maluwas ug kung kinsa ang dili maluwas, nan makahimo Siya sa pagpili-nang-daan. Busa, ang maong pulong dili man diay ingon nga di-maayo nga pulong, dili ba? Makahimo Siya sa pagpili-nang-daan, tungod kay nahibalo na man Siya kung kinsa ang maluwas ug kung kinsa ang dili. Busa, aron nga makuha kadtong mga maluwas, gikinahanglan Niyang mohimo og usa—usa ka halad-pasig-uli para sa ilang mga sala. Oh, kung mahimo nato, gusto gyud natong makadangat niining, pipila na lang ka mga bersekulo sa ubos. Iya kitang gipili-nang-daan ngadto sa Kinabuhing Walay Katapusan, ingon nga hingsayran na kung kinsa kadtong magahiklin sa tanang butang, ug bisan unsa pa kini ka dili-mahinungdanon para sa mga anak sa kalibutan, wala kana nagkahulogan ni unsa man para kanila, tungod kay mga anak man sila sa Dios. Ug mga tinawag Niya sila.

⁵⁵ Ug gipadala Niya si Jesus, aron ang Iyang Dugo ang mamahimong usa ka pangbayad-sa-sala, Dugo nga pangbayad-sa-sala, aron mohimo og usa ka halad-pasig-uli, o usa—usa ka pagdawat, o paglimpyo. Usa ka proseso sa paglimpyo

nga kanunay'ng...Dili nga usa lamang ka higayon sa usa ka rebaybal, kondili “kanunay gayud nga buhi, nga nagapangaliya,” aron mapapabilin nga limpyo ang Cristohanon adlaw ug gabii. Mao kana ang Dugo ni Jesus Cristo nga nagahimo og—og pagdawat didto sa krus, sa...sa Presensiya sa Dios, nga padayong nagalimpyo kanato, adlaw ug gabii, gikan sa tanang sala. Ug luwas gyud kita nga nakasulod. Giunsa man nato pagpakasulod? Pinaagi sa Balaang Espiritu, pasulod ngadto sa Lawas ni Ginoong Jesus, ug luwas na. “Siya nga nagapatalinghug sa Akong mga Pulong ug nagatoo Kaniya nga nagsugo Kanako, adunay Kinabuhing walay katapusan ug dili na pagahukman sa silot, kondili miagi na gikan sa kamatayon ngadto sa Kinabuhi.” Dili na pagahukman sa silot! Tungod dili man mopaingon ang Cristohanon ngadto sa paghukom. Si Cristo na ang miadto para kaniya. Mibarug na sa akong lugar ang akong Abogado. Iyang gidepensahan ang akong kaso, nga ako walay-hibangkaagan. Iyang gisultihan ang Amahan nga ako dili-takus, nga ako walay-hibangkaagan. Apan tungod gihigugma man Niya ako ug Siya ang mipuli kanako, ug gidepensahan ang akong kaso, ug ako karon abswelto na! Oo, sir. Ug giula Niya ang Iyang Dugo, aron ihalad didto para sa atong mga sala.

⁵⁶ Kon mahinumduman n'yo niadtong miaging Miyerkules sa gabii, walay Cristohanon...makasala ang Cristohanon, apan ang usa ka makasasala dili man makasala. Dili nagapakasala ang usa ka makasasala, tungod siya'y usa man ka makasasala mismo. Siya'y usa na gayud ka makasasala sa sugod pa lang, ug kana lang. Ania, ipananglitan ta ang—ang luyo nga bahin niini nga basahon, itum kini, og unsa man kaitum kini? Bug-os kini nga itum. Wala gayu'y puti nga bahin niini, itum ra kini. Moingon mo, “*Ingon niini* kaitum dinhi.” Dili, dili ingon-ana, tungod itum man gyud ang tibuok butang. Puro kini itum. Ingon niana sàb sa usa ka makasasala. Siya'y hinukman na gayud sa sugod pa lang. Bueno, moingon mo, “Unsa kaha kung nagapanapaw siya? Unsa kaha kung duna siya'y gilugos nga babaye? Unsa kaha kung siya—unsa kaha kung nagasugal siya? Unsa kaha kung aduna siya'y gipusil?” Wala kita'y labot niana. Wala na kita'y labot niana, aduna man kita'y mga balaod dinhi nga mao na'y bahala niana. Dili man kita mga repormador, mga magwawali kita sa Maayong Balita. Dili nato siya ginakondena tungod sa iyang gibuhad, dili nato siya ginakondena tungod sa pagpanapaw. Kondili ginakondena nato siya tungod nga usa siya ka makasasala! Kay kung Cristohanon pa siya, dili man niya buhaton ang ingon-niana. Tinuod. Kung nabag-o na siya, dili man niya buhaton ang ingon-niana. Apan tungod kay makasasala man siya, nan mao kana'y nagpahinungdan kaniya nga buhaton kana.

⁵⁷ Dinha mawad-an og—og mga pangatarungan ang mga

legalista. Oo, sir. Igsoon, sultihan ko kamo, “Dili pinaagi sa mga buhat, kondili pinaagi gyud sa grasya kita nangaluwas, ug pinaagi kana sa pagtoo.” Oo, sir. Bueno, dili ingon nga ginasaway ko ang mga kaigsoonang legalista, mga igsoon ko man sila. Ug mamaatua baya sila didto sama ra nga mamaatua sàb ang uban pa kanila, tungod kay gitagana na mang daan sa Dios ang Iyang Iglesia nga mamaatua didto. Apan ang punto lang, nga inyong—sige ninyong ginapabalaka ang mga tawo, hangtud nga wala na sila kahibalo kung unsa. “Karon, bueno, dili ingon kung ako—ako. . .” Ipahibalo n’yo lang kanila; pero samtang aduna pa sila’y tinguha sa kalibutan, nan dili gyud sila mamaatua didto sa sugod pa lang.

⁵⁸ Dili ingon nga nagakinabuhi ako nga matinud-anon sa akong asawa tungod lang kay gahunahuna ko nga basin iya akong bulagan. Nagkinabuhi gyud ako nga matinud-anon sa akong asawa tungod kay gihigugma ko siya. Usa kini ka legal nga katungdanan nga among ginatuman, tungod kay ginahigugma man namo ang usa’g usa. Pero una, sa dili pa man mamaingon niana, kinahanglan nga pinasikad gyud kini sa gugma. Gihigugma ko siya. Bisan pa kon nagatoo ko nga kung makabuhat man ako og usa ka butang nga sayup, pasayloon ra niya ako, dili ko gihapon buhaton kana bisan pa man. Tungod gihigugma ko gayud siya.

⁵⁹ Ingon niana usab kang Cristo. Kung ako—kung mabuhi ako. . .singkwenta na man ko, kung mabuhi pa ako hangtud sa nubenta o usa ka gatus ang panuigon, og magkaaduna pa og singkwenta ka tuig para magwali, pero kung wala man ako nagwali ni usa ka higayon, miadto lang ug milingkod sa may sapa, luwas gyud gihapon ako bisan unsa pa man. Giluwas ako sa Dios tungod sa Iyang grasya, nga dili gyud nako takus nga madawat bisan pa kon basihan ang mahimo kong buhaton, ang mga nabuhat ko na, o unsa pa man. Nagawali ako tungod kay gihigugma ko Siya ug gihigugma ko usab ang Iyang katawohan. Ug mao kana’y hinungdan nga nasayod akong miagi na ako gikan sa kamatayon ngadto sa Kinabuhi, tungod kay gihigugma ko sila ug nagaadto gyud ako alang kanila. Bisan unsa pa ang matang sa kahimtang nga ilang nahimutangan, adtoan ko gihapon sila bisan pa man. Adtoan ug kuhaon ko gihapon sila, og aghaton ko gayud sila. Kung dili man moyon ang mga ministro ug dili moyon ang uban pa, ug dili moyon ang mga denominasyon, dili gyud kana makapahunong kanako. Tungod aduna gayu’y sa kung unsang butang! Wala man kadto nakapahunong Kaniya kaniadto! Miabot Siya mismo taliwala sa mga dili-pagtoo, ug wala kadto nakapahunong Kaniya, mipadayon gyud Siya bisan pa man. Mao sàb kana’y ginabuhat nato, nagasangyaw tà ug ginaaghat sila, ginakuha sila sa unsa man nga paagi. Bisan unsa pa man, pangkab-ot, panggunit, og panghawid kamo sa bug-os n’yong kusog. Wala n’yo man hiilhi

kung kinsa sila. Ginaluwas n'yo sila. Kay tungod kana sa gugma. Dili tungod kay "Kinahanglan kong buhaton," kondili tungod kay nagahigugma ako, tungod kay nagahigugma kamo.

⁶⁰ Moingon, "Kinahanglan kong moadto ug ihusto kadto sa maong babaye, apan, sultihan tà ka karon, sa hunahuna ko tungod kay nagasimba man gud ko mao nga kinahanglan ko gayud nga ihusto kadto." Dili, ikaw mismo ang angay'ng maihusto, una. Kita n'yo? Kita n'yo? Kung wala pa ang gugma sa Dios diha sa imong kasingkasing, duna gyu'y sa kung unsang butang nga nagapahibalo kanimong sayup ka, kung ingon-ana umadto ka—kung ingon-ana umadto ka ug ihusto ùna kana sa Dios. Dayon ihusto mo na kini sa imong silingan.

⁶¹ Ingon niana man sàb ang gikatudlo ni Jesus. Miingon Siya, "Kung moduol kamo sa halaran, ug dunay usa ka... madumduman nga aduna kamo'y unsa man nga batok sa usa ka silingan o sa igsoon, lakaw ug ihusto una kana, kaniya."

⁶² Karon, bueno sa mga kapanahonan nga umalabot. Atong nahisgotan niadtong Miyerkules sa gabii, "ang mga pagkapinadayag." Mahisgotan na usab nato kini karong buntaga, ang bahin sa "pagkapinadayag sa mga anak sa Dios." Sa laing pagkasulti, nagahulat ang Dios. Ug dayon sa katapusang panahon pag mobarug na kitang tanan sa Iyang atubangan. Ang mga Anghel wala man nahisalaag. Dili nila masayran kung unsaon pagtagamtam sa mga panalangin nga atong natagamtaman, wala man gud sila sukad nahisalaag. Apan nasayod gyud ako kon asa ako naggikan, nasayod ako sa bato kon diin ako gitapyas, ingon nga usa ka makasasala. Nasayod pud kamo kon diin kamo gitapyas. Karon sa nahikaplagan na kita, nan mamahimo na kitang mobarug sa atubangan sa Dios. Oh, pagkaanindot gayud niana nga adlaw!

⁶³ Dayon ang pagsagop na, ang pagpahimutang na. Ngani, karon ginabuhat na sa Dios kini nga buluhaton. Ug karon kung naipasabot ko na kini kaninyo, nan magsugod na tà karon bahin sa ika-5 nga bersekulo, gusto kong basahon ùna Kini.

Kita iyang gipili-nang-daan ngadto sa pagkahimong mga anak nga sinagop pinaagi kang Jesus Cristo ngadto sa iyang kaugalingon, sumala sa Kaugalingon Niyang maayo nga katuyoan sa iyang kabubut-on,

⁶⁴ Katuyoan sa Dios nga buhaton ang Iyang kabubut-on, ang pagsagop, ang pagpahimutang. Karon unsa ba'y ginabuhat Niya? Ginapahimutang ang Iyang Iglesia. Una, gitawag Niya ang Iyang iglesia, Methodist, Presbyterian, Lutheran, Baptist, ginatawag kini sila. Dayon unsa ma'y gibuhat Niya? Iyang gipadala ang Balaang Espiritu ug gihatag kanila ang bautismo sa Balaang Espiritu.

⁶⁵ Buut ko nga wagtangon n'yo na unta kini sa inyong mga kasingkasing kamong mga Pentecostal. Ang pentecostes dili

man usa ka denominasyon; ang pentecostes usa ka kasinatian. Kini mao ang Espiritu Santo. Dili kini usa ka organisasyon. Dili man ninyo mahimong organisahon ang Espiritu Santo. Dili gayud Niya kana mapahanugotan. Pero karon aduna na kamo'y usa ka organisasyon nga ginatawag ninyo og ingon-ana, apan migawas mismo ang Espiritu Santo ug gipasagdan na kamo nga magpabilin sa inyong nahimutangan, samtang nagapadayon lang Kini. Kita n'yo? Ang pentecostes dili man organisasyon; ang pentecostes usa mismo ka kasinatian.

⁶⁶ Ug dayon gihatagan sa Dios ang Iyang mga anak og bag-ong Pagkahimugso, pinaagi sa bautismo sa Balaang Espiritu. Ngani nakadangat man sila nga haduol na mismo Niini kaniadtong gilimpyohan nila ang ilang kaugalingon, pinaagi sa pagka-Nazarene, pagka-Pilgrim Holiness. Dayon ilang nasinati ang kasinatian pentecostes, o ang bautismo sa Espiritu Santo, ang pagpasig-uli sa mga gasa. Nanagsangyaw sila nga may pagsulti og laing mga pinulongan ug ginahubad pud ang maong mga pinulongan, ug gikahatagan sab sila og mga gasa sa pagpangayo ug mga milagro, ug hinay-hinay nga naganunot kanila ang mga ilhanan ug mga katingalahan. Bueno mga anak man sila, mga anak sila sa Dios. Nakapuwesto na sila kang Cristo. Nahimo silang mga anak pinaagi sa Pagkahimugso. Tungod ang bag-ong Pagkahimugso ug ang pagkabag-o Mismo mao man ang Espiritu Santo.

⁶⁷ Gani dili pa man kamo mabag-o gawas kon maangkon n'yo na ang Espiritu Santo. Mao kana ang giingon sa Kasulatan. Gisultihan ni Jesus si Pedro, pangutan-a n'yo ang si kinsa man, basaha ninyo ang Kasulatan, gimatarung kaniadto si Pedro pinaagi sa pagtoo kang Ginoong Jesus, og nahimong usa ka sumusunod, usa ka apostoles. Gihatag pud ni Jesus sa iyaha ang mga yawi sa Gingharian. Ug sa Juan 17:17, gibalaan Niya sila, gihatagan sila og gahum, gipadala sila, naghingilin sila og mga yawa ug mga ingon-anang butang, gibalaan sila. "Balaana sila, Amahan, pinaagi sa Imong Kamatuoran. Ang Imong Pulong mao ang Kamatuoran. Ako nagabalaan sa Akong Kaugalingon tungod kanila."

⁶⁸ Usa kana sa pinakamaanindot nga mga pulong nga akong nadungog sukad-sukad. "Amahan, Ako nagabalaan sa Akong Kaugalingon tungod kanila." Kabalo ba mo nga aduna Siya'y katungod nga magkaaduna og panimalay kaniadto? Tawo man Siya. Kabalo ba mo kon nganong aduna Siya'y katungod nga magkaaduna og asawa? Usa man Siya ka Lalaki. Aduna gyud unta Siya'y katungod sa tanan niining mga butanga, apan ang ingon Niya, "Amahan, Ako nagabalaan sa Akong Kaugalingon tungod kanila. Ako nagabalaan sa Akong Kaugalingon."

⁶⁹ Kaestorya ko ang usa ka magwawali kagahapon, magwali man gud ko para sa iyang simbahan sulod sa pila ka gabii dinhi dapit sa may highway. Ug gipangutana ko siya mahitungod

sa usa ka butang, ingon siya, “Oo, Igsoong Branham, pero kadaghanan sa akong mga miyembro dili man nagatoo niana.”

Ingon ko, “Legalista ba ang kadaghanan kanila?”

⁷⁰ “Oo.” Ang maong igsoon dili man sàb nagatoo niini. “Apan,” ingon siya, “tungod kanila!” Oh, gusto kong gaksan siya. “Tungod kanila, kita mo, ginabalaan ko ang akong kaugalingon tungod kanila.”

⁷¹ Oh, gibansay ni Jesus kaniadto ang dose ka kalalaken-an, aron kadtong dose ka kalalaken-an ang magdala sa Maayong Balita nganhi sa kalibutan. Ug miingon Siya, “Tungod kanila Ako nagabalaan sa Akong Kaugalingon.” Balaana n’yo usab ang inyong kaugalingon tungod sa inyong silingan, tungod ni kinsa pa man. “Ayaw n’yo gamita ang inyong kagawasan ingon nga takuban,” ang ingon ni Pablo, “kondili balaana n’yo ang inyong kaugalingon!” Pagminatarung kamo sa mga kasilinganan, maingon sa angay’ng buhaton sa usa ka tinuod nga Cristohanon. Ang inyong mga pagsulti ingon-niini, kung matagbo n’yo ang inyong kaaway, balaana n’yo ang inyong kaugalingon tungod kaniya, ingon nga wala kamo nanghibalo sa kung unsay mahimo n’yong buhaton.

⁷² Bueno bahin sa pagpahimutang sa anak. Ang unang butang human nga matawo ang maong anak, hinoon siya’y usa na ka anak, pero hingsayran nato nga ang iyang kinaiya mao ang magpahimutang kaniya ngadto sa pagkasinagop, kon nagminatarung ba siya o wala.

⁷³ Ug ingon niini ang sa—sa pentecostal...Karon tugoti lang kong ipakita kaninyo nga ang Pentecostes dili usa ka denominasyon. Pila ba ka mga Baptist ang ania dinhi nga Baptist na kaniadto, og nga nakadawat na sa Espiritu Santo, patan-aw sa inyong mga kamot. Kita n’yo? Pila ba ka mga Methodist ang ania dinhi nga nakadawat na sa Espiritu Santo, ipataas n’yo ang inyong mga kamot. Kita n’yo? Pila ba ka mga Nazarene ang ania dinhi nga nakadawat na sa Espiritu Santo? Ipataas n’yo ang inyong mga kamot. Mga Presbyterian usab, nga nakadawat na sa Espiritu Santo. Kita n’yo? Lutheran. Uban pang mga denominasyon, nga dili gani miyembro sa Pentecostal, kondili miyembro lang sa kung unsa nga denominasyon, pero nakadawat na sa Espiritu Santo, tan-awon tà ang inyong kamot. Kita n’yo? Busa kung ingon niana ang Pentecostes dili gyud usa ka denominasyon, kondili usa kini ka kasinatian.

⁷⁴ Bueno, gidala kamo sa Dios pasulod ngadto sa Lawas ni Cristo (Karon unsa na ma’y buhaton Niya?) human nga napamatud-an n’yo ang inyong kaugalingon, gipabalaan ang inyong kaugalingon pinaagi sa maayo n’yong kinaiya, og pagkamasinugnaton sa Balaang Espiritu, bisan unsa pa’y ginasulti sa kalibutan.

⁷⁵ Ako—mangkuskos gyud ko og ayo karon, kita n'yo, tungod kay . . . pero dili ko baya tuyo nga magsinalbahis. Ako—ako . . . kung mahimo dili—dili—dili gayud unta, kita n'yo. Mao nga ayaw n'yo gayud hunahunaa nga ako'y—ako'y mabagison. Ako—dili ko gayud gusto nga mamaingon-niana. Nagapabalaka man gud kanako, nga pag madala ko ang mga tawo ug iwali kanila kining Kamatuoran nga pinadala-sa-Dios, unya mamalik ra gihapon sila ug padayon nga buhaton ang mao gihapong butang, ug moingon pa nga ila na konong naangkon ang Espiritu Santo. Halos madaut ka gayud niana, kita n'yo. Unsa ma'y nagakahitabo? Nagabalik sila mismo sa mao gihapong butang, sama lang sa mga anak sa Israel, nga gusto nila kaniadto og usa ka hari aron nga kining maong hari na ang mangulo kanila ug tugotan ra silang manglihok nga sama sa mga Amorehanon ug sa mga Amalekanhon ug sa mga Filistihanon.

⁷⁶ Kabalo ba mo, mga gining, nga sayup ang magsul-ob og karsones? Kabalo ba mo niana? Kabalo ba mo nga sayup putlan ang inyong buhok? Kabalo ba ka, mister, nga sayup nga padayon kang nagapanigarilyo ug nagalihok nga ingon niana? Kabalo ba ka nga sayup kon dili ka magmahimo nga bana sulod sa imong panimalay, pag medyo motukar ang kainit sa ulo sa imong asawa ug sipaon ka pagawas sa pultahan ug moingon pa ka, “Oo, panalanginan unta ang imong kasingkasing, pinangga, mobalik ra ko”? Kabalo ba ka nga imong . . . Unsaon man nimo sa pagkahimong usa ka tigdumala sa Balay sa Dios kon dili mo man gani madumalahan ang kaugalingon mong panimalay? Eksakto gayud. Kabalo ba ka, igsoong babaye, nga dili mo lang basta bana ang imong bana, kondili siya usab ang imong tigpangulo? Mao kana ang gisulti sa Dios. Tungod kay dili man ang bana ang nalimbongan, kondili ang babaye mao ang nalimbongan. Ug kamong mga magwawali nga padayon sa gihapon nga nagapili og mga babayeng pastor ug mga magwawali sa inyong mga iglesia, nga nanghibalo man unta mo nga ginakondena gyud kana sa Pulong sa Dios.

⁷⁷ Padayon n'yo gihapon nga ginagamit ang ngalan sa “Amahan, Anak ug Espiritu Santo” para sa pagpangbautismo, sa dihang wala ma'y ni usa ka Kasulatan bahin niana diha sa Biblia. Gusto kong ipakita kanako sa usa ka arsobispo o ni kinsa pa man kon diin dunay si bisan kinsa sa Biblia kaniadto ang nabautismohan sa ngalan sa “Amahan, Anak, og Espiritu Santo.” Gusto kong ipakita kanako ni kinsa man kon duna ba'y si bisan kinsa nga nabautismohan sa unsa mang paagi gawas sa Ngalan ni Jesus. Apan gawas sa kang Juan . . . nabautismohan, nabautismohan sila tungod sa pag-too nga Siya moabot kaniadto, pero wala pa man sila nakaila kung kinsa gyud Siya. Ug sa dihadhiha nga naila na nila kadto, nan gikinahanglan nila nga moduol aron magpabautismo pag-usab sa Ngalan ni Jesus Cristo. Gusto kong adunay . . . ako—ako nang gihagit ang

Assemblies of God, ang ubang mga magwawali, ang Baptist pud, Presbyterian, ug tanan na. Pero ayaw nila—ayaw na nilang maghisgot mahitungod niini. Gusto ko unta nga makita gyud ang Kasulatan.

78 Ug dayon usa kono ako ka “panatiko,” huh, ug ako’y “buang-buang,” nga nawad-an na kono sa akong maayong panimuot, nga usa kono ako ka “tawong wala sa hustong pangisip,” tungod lang kay ginapaningkamotan kong isulti kaninyo ang Kamatuoran? Karon, kana’y—prangkahan kana, mga igsoon. Kung ang usa ka tawo hingpit gayud nga nahitugyan na ngadto sa Dios, nan bug-os ka na gayud nga nahitugyan. Ikaw—ikaw—ikaw—ikaw’y—gipahilain ka na, ikaw’y—lahi ka na nga linalang.

79 Daghan ang mga gipanawag, pero diriyut ra ang mga napili. Oo, daghan bitaw nga mga tawo ang gipanawag, magkaaduna mo og pagtawag sa inyong kasingkasing, “Oo, nagatoo ko nga gihigugma ako sa Dios. Nagatoo ko nga nagahigugma gyud Siya kanako.”

80 Apan, igsoon, kon ingon-ana, mahisalaag ka gayud sa ingon ka halayo sama sa tanang uban pa kanila, tungod kay magaduol sila didto nianang adlaw, nga moingon pa, “Ginoo, naghingilin man ako og mga yawa tungod sa Imong Ngalan. Gibuhat ko man ang tanang uban pang butang sa Imong Ngalan. Nagpahigayon pud ko og mga panerbisyo sa pagpang-ayo. Giwali ko ang Maayong Balita. Naghingilin ako og mga yawa.”

81 Ug moingon si Jesus, “Pahilayo ka dinhi, wala gani Ako makaila kanimo, hipokrito. Kondili kaniya lamang nga nagabuhat sa kabubut-on sa Akong Amahan!” Nganong dili man kana makita sa mga tawo? Bueno, kabalo ko nga makapasakit kana. Pero wala ko—wala ko baya ginatuyo nga magpasakit, wala ko ginatuyo nga mahimong ingon niana. Apan, igsoon, ako—ako . . .

82 Para kanako kita’y—ania na kita sa katapusang panahon, ug ginasagop na sa Dios, ginapahimutang na sa hustong pagkapuwesto sulod sa Iglesia, sulod sa Lawas ni Cristo, ang mga Iyaha. Bueno, dili baya ingon ka daghan ang ipahimutang Niya dinha, sultihan ko na kamo niini karon pa lang. Moingon mo, “Oh, bueno, magkaaduna man gihapon og ingon ka daghan!” Pero unom man ka libo ka tuig ang gigahin Niya aron makuha sila, usab. Hinumdumi n’yo, pag moabot na ang pagkabanhaw ug pagalalinon man kita uban kanila. Diyutay lang pud kanila, kita n’yo. Mao nga susiha n’yo ang inyong kaluwasan, sa gilayon. Susiha n’yo ang inyong kaugalingon ug hibaloa kung unsa ang nahimong sayup. Kita n’yo? Hibaloa gayud—gayud kung unsa ang problema. Kabalo ko nga kana’y—mabug-at kana, apan, igsoon, mao kana ang Kamatuoran. Kana ang Kamatuoran sa Dios. Pagsagop!

⁸³ Kinahanglan magmadasigon gayud kita alang sa Dios, kinahanglan madasigon kita adlaw ug gabii. Wala gayu'y angay'ng makapahunong kanato, ug kinahanglan mamahimo kita nga malumo gayud ug ingon ka makapahimuot, ug buutan kaayo ug mahisama gayud kang Cristo sa atong mga pagkinabuhi. Kinahanglan sa pang-adlaw-adlaw gyud nga pagkinabuhi. Miingon si Jesus, "Palandunga ninyo ang mga lirio sa kaumahan, kung giunsa niini pagtubo, pagpangabudlay ug pagkalinyas; apan nagaingon Ako kaninyo nga si Solomon sa tibuk niyang himaya wala makabisti nga sama sa usa niini." Hinoon aduna ma'y mga bisti si Solomon nga dinayan-dayanan og maanindot nga seda ug ginansilyo pa ug mga ingon-niana, apan kadto—dili kadto . . .dili kadto ang Iyang ginapahinungdan. Aron nga motubo ang usa ka lirio, kinahanglan niini nga mangabudlay adlaw ug gabii. Para sa unsa ba diay nga ginatinguha ninyo nga makadangat dinhi sa tumoy niining linya? Kung ang matarung malisud man ganing maluwas, unsa pa kaha ang makasasala, kana mao ang dili-magtotoo, ug ang mga dili-diosnon, ang tawo nga nakapatalinghug na unta sa Pulong, pero nagadumili pa sa paglakaw Niini . . .? Karon unsa ma'y atong buhaton? Kita n'yo? Karon ingon nga . . .

⁸⁴ Kini'y, bueno, ato man kining iglesia. Ngani mora'g aduna la'y upat o lima ka estranyo sa atong taliwala karon. Apan kini mao ang iglesia, diin ako nagatudlo kaninyo. Ingon nga nakarekord kini sa mga teyp. Gusto ko nga ang mga tawo nga nagapaminaw sa mga teyp, hinumdumi n'yo, nga para lang kini sa akong iglesia. Dinha pud sa mga tawo nga taga-gawas, gapaningkamot ko nga magminaayo gayud sa pagsulti kanila niini, nga medyo bebi-bebihon lang ùsa sila diha sa ilang diyutay'ng mga ideya nga hinapaw'ng gatas. Apan paghisgotan na ang pagpahayag gayud sa Kamatuoran, nan ato gyud Kining ipahayag.

⁸⁵ Ang pagsagop, ang paghimutang sumala sa hustong pagkapuwesto! Asa man sila nahimutang? Ipakita n'yo kanako kung asa sila nahimutang. Ginatawag og ginapahilain sa Dios ang Iyang mga anak pinaag'g kapadayagan. Dili nila kinahanglan mosulti ni usa ka pulong mahitungod niini, makita n'yo na lang nga aduna gyu'y nahitabo. Ginapuwesto ang Iyang anak, ginahan-ay siya sumala gayud sa mao gihapong mga pamaagi. Siya—duna siya'y dakung kagahum, ang mga pulong niya ingon gayud nga may awtoridad sama sa mga pulong sa usa ka Arkanghel, mas may awtoridad pa gani. Gisagop na ang anak, gipahimutang na diha sa usa ka mahabog nga puwesto, gipalingkod na didto, giilisan na siya og bisti, giilisan na ang mga kolor. Naghimo ang amahan og seremonya, miingon, "Mao kini ang akong anak, sukad karon siya'y gobernador na. Siya na ang tigpangulo. Siya na ang magdumala sa tanan kong kabilin.

Ang tanan-tanan nga aduna ako panag-iya na niya.” Tinuod kana. Kung ingon niana atong mabalikan ang mao ra nga, Elah, Elah, Elohim, Elohim, kita n’yo, ingon nga Siya kaniadto nagalungtad-nga-nag-inusara. Ug dayon mabalikan usab si Jehovah Nga nagbuhat og usa ka butang, Iyang gihatagan ang tawo og kagahum sa yuta. Unsa pa ba’y atong ginahulat? Ang pagkapinadayag. Nagaagulo na ang yuta. Atong padayonon kini ug basahon kini. Sige.

...gipili-nang-daan...aron sa pagkahimong mga anak nga sinagop pinaagi sa...iyang kaugalingon, sumala sa Iyang maayo nga katuyoan sa iyang kabubut-on,

Alang sa pag-...alang sa pagdayeg sa himaya sa iyang grasya,...

⁸⁶ Unsa man ang Iyang grasya? Kaniadtong, dili pa Siya usa ka Amahan; tungod sa Iyang grasya, sa Iyang gugma, nagbuhat Siya Mismo og usa ka anak, aron kita mapili-nang-daan ngadto sa pagkasinagop ingon nga mga anak, alang sa pagdayeg sa Iyang grasya. Kita n’yo?

...nga sa walay-bayad gihatag niya kanato pinaagi sa—sa (sa maong Persona) hinigugma, nga mao si Cristo.

⁸⁷ Sa unsa mang paagi nga kita gidawat? Pinaagi Kaniya. Unsaon man nato pagsulod Kaniya? Pinaagi sa usa ka Espiritu, ang tanan gibautismohan pasulod ngadto Kaniya. Paminaw mo.

Diha kaniya kita may katubsanan, kita may katubsanan pinaagi (sa) iyang dugo, ang kapasayloan alang sa atong mga p-a-g-l-a-p-a-s...

⁸⁸ Pero unsaon man nimo sa pagwali ang bahin sa predestinasyon, bahin sa pagtagana-nang-daan sa Dios ug pagpahimutang, gawas kon aduna na sa kon asa man og usa ka pangbayad sa sala? Nganong ingon-ana man? Matag adlaw nagakasayup ka, matag adlaw makabuhat ka og sayup. Apan kung natawo ka na pag-usab, lalaki o babaye man, sa dihadiha nga nasayup ka, hingsayran na sa Dios nga nagabasol gyud ka tungod niana. Mahimo mong motindog sa atubangan ni—ni Presidente Roosevelt o ni bisan kinsa pa man, ug moingon, “Nasayup ako, pasayloon unta ako sa Dios tungod niini nga butang.” Ngano man? Ug dinha ang Dugo nga pangbayad-sa-sala...

⁸⁹ Matikdi n’yo kanang “m-g-a-s-a-l-a.” Ang makasasala usa na gyud ka makasasala, dili siya ingon nga magahimo pa og sala. Apan ang iglesia hinoon ang makahimo pa og sala, makabuhat og sayup, makahunahuna og sayup, magkaaduna og sayup nga panghunahuna, magaduhaduha, magasusapinday maingon sa usa ka gamay’ng bata nga nagalakaw, nga nagatuon pa kung unsaon sa paglakaw. Dili pa gayud siya kahibalo kung unsaon

sa paglakaw og tarung, tungod kay siya gamay'ng batang lalaki pa man. Apan aduna gayu'y Kamot nga nagakab-ot kanato kung kita . . . nga nagaagak kanato ug nagatabang kanato, ug moingon, "Pagtikang paingon *niini* nga direksyon, anak." Dili Niya kita patindogon ug bunalan tungod kay nasayup kita, dili Niya kita ginalatigo hangtud nga halos mamatay na tungod lang nga gapaningkamot tâng molakaw. Gihigugma gyud tà Niya sama ra nga gihigugma pud nato ang atong mga anak.

⁹⁰ Ang usa ka tinuod, gayud nga amahan dili man niya bunalan ang iyang anak pag nagasulay pa ang maong bata nga makalakaw, kung matumba man gani siya sa salog. Abton hinoon niya gamit ang dakung kusgan nga kamot ug patindogon kini, hawiran ang duha ka kamot niini, og moingon, "Sa ingon niini nga paagi mo kini buhaton, anak. Lakaw ka nga ingon *niini*."

⁹¹ Ingon niana usab ang ginabuhat sa Dios sa Iyang Iglesia! Abton ug agakon kini diha sa Iyang bukton, patindogon kini ug moingon, "Lakaw ka nga ingon *niini*, anak. Ania, ayaw—ayaw—ayaw kini isulti nga ingon niana, kondili ipamulong kini nga ingon *Niini*. Karon, dili Ko igsapayan kung unsa man ang ginasulti sa iglesia, kung unsa man ang ginasulti *niini*, kung unsa man ang ginasulti *niana*, basta isulti mo kini nga ingon *Niini*. Sama *Niini*, mao Kini! Kung ginawali Kini sa Akong Pulong, nan magpabilin ka mismo Niini, og magkinabuhi ka pinaagi Niini. Magpabilin ka mismo Niini. Ayaw panumbalinga bisan unsa pa ma'y ginasulti sa tanang uban pa, magpabilin ka mismo Niini. Lakaw ka nga ingon *Niini*. Angay nga ingon niini ang imong pagtikang."

⁹² Ngani ang atong mga sala; kung dili pa tungod sa gugma nga mao'y pangbayad sa atong mga sala, nan wala gyud unta kita'y paglaum. Mao nga makaangkla gayud kita sa niini nga mga Pulong!

. . . *sumala sa kadagaya sa iyang grasya;*

Nga iyang—iyang gipadagaya . . .

⁹³ Unsa ba ang "kadagaya"? Oh, pagkanindot! Nga Iyang *gipadagaya*, "sa hilabihan gayud."

. . . *iya nga gipadagaya alang kanato sa bug-os nga kaalam ug salabutan;*

⁹⁴ "Salabutan, og bug-os nga kaalam nga Iyang *gipadagaya* alang kanato." Bug-os nga "kaalam," dili nga pang-kalibutanon. Tungod ang kaalam nga iya sa kalibutan kabuangan man para Kaniya, ug ang kaalam sa Dios kabuangan pud para sa kalibutan. Sama lang sa adlaw ug gabii, nga dili magkauyon sa usa'g usa. Apan pag hinay-hinay nang nagasubang ang adlaw ug adlawan na, nan nagakawala na pud ang gabii gikan sa usa ka bahin ngadto sa usa pa ka bahin. Ug sa diha nga mosugod na sa

pagsubang ang Kahayag sa Ebanghelyo, nan hinay-hinay na pud nga nagakahanaw ang tanang mga butang nga iya sa kalibutan. Ug unsa ma'y nagakahitabo? Iyang ginapadagaya ang Kahayag-sa-adlaw nganha sa Iyang mga anak, nga nagakinabuhi diha sa Espiritu, ginapangunahan sa Espiritu sa Dios, madagayaon diha sa Iyang grasya, og may bug-os nga salabutan ug kaalam, pagsabot, ug pagkamaalamon aron mahibalo kung unsaon sa paglakaw. Kon nakita n'yo nga sayup, nan mag-amping kamo sa inyong pagabuhaton, kung unsaon n'yo. . . Kung sayup man, nan mag-amping gayud kamo kung unsaon n'yo sa pagharong niana. Magmaalamon! Magbantay gayud, og siguradoha gayud nga nakahibalo kamo kung unsaon sa pagharong niana. Maalamon sama sa mga bitin, malumo sama sa usa ka salampati. Mao kana ang gisulti ni Jesus.

⁹⁵ Oh, mga mahinungdanong butang kini, mga higala! Mahimo gani natong magpabilin ra niini sa matag adlaw. Dili ba pagkaanindot niini? Ang salabutan, kaalam, nga Iyang gipadagaya alang kanato, og gibubo gayud! Dili nga gihatagan kita og usa lang ka kutsara, kondili migamit hinoon og usa ka dakung pala ug padayon lang nga nagaita niini nga sama niana. Gipadagaya alang kanato, ang kaalam nga may salabutan sa Iyang grasya! Oh, makahibulongang grasya, pagkatam-is nga tingog!

Bueno, *nga iya nga gipadagaya alang kanato sa bug-os nga kaalam . . . salabutan;*

Nga iyang gipahibalo nganhi kanato ang tinago mahitungod sa iyang kabubut-on, . . .

⁹⁶ Kang kinsa man Siya nagapakig-istorya? Sa mga denominasyon ba? Palihog, mga igsoon ko, ayaw gyud ninyo hunahunaa nga ginapakaubos ko ang inyong denominasyon, wala baya gyud. Kondili ginapaningkamotan ko lang isulti kaninyo nga sayup kana nga butang sa sugod pa lang. Ang ingon ni Jesus, “Panglakaw kamo ug iwali ang Maayong Balita,” hinoon nanagsangyaw man ta pero nanagtukod pud lagi og mga denominasyon. Mao kana'y hinungdan kon nganong wala nato naangkon Kini, tungod nga nagalakaw man ta uyon sa kaalam nga iya sa tawo. Kung mabanhaw lang gyud unta si Calvin!

⁹⁷ Aba, dili pa lang dugay mitindog ako didto tupad sa lubnganan sa maong halangdong tawo, usa ka halangdong repormador. Ug nahunahuna ko, “Pagkahalangdon gyud niya nga tawo!” Mao gayud! Bueno, kadto . . . dili ko . . . Si John Wesley diay kadto. Ug nahunahuna ko, “Kung mabanhaw lang unta si John Wesley gikan niini nga lubnganan karon ug makita ang kahimtang sa iyang iglesia, nan ikaulaw gyud niya ang iyang ngalan!” Hinoon si John Wesley usa man ka diosnon nga tawo, usa ka nagadilaab nga бага, sama sa tawag niya niini. Si John Wesley usa ka balaan nga tawo nga nagatoo sa Dios,

ug matag lakang nga misunod gayud Kaniya. Apan human nga namatay si John, miingon sila, “Magtukod kita og iglesia para kang John aron magkaaduna pud ta og iglesia, ug tawgon nato kining iglesiang Methodist tungod sa iyang pamaagi bahin sa pagpabalaan ingon nga ikaduhang buluhaton sa grasya.”

⁹⁸ Dayon nagtukod sila og iglesia, pero karon ginapanghimakak na man sa mga tawo sa maong iglesia ang tanan-tanan nga gibarugan kaniadto ni John Wesley. Nagwali man si John Wesley og bahin sa Balaanong pagpang-ayo. Mitoo sàb si John Wesley sa bautismo sa Espiritu. Mitoo pud si John Wesley sa bug-os nga pagpasig-uli sa mga gasa. Ngani sila ni John Wesley, Martin Luther, og daghan niadtong bantugan nga mga kalalaken-an nanagsulti man og laing mga pinulongan ug nanaghubad. Pero, sa karong panahon, kon mosulti ka gani og laing mga pinulongan diha sa iglesiang Methodist o kaha sa iglesiang Lutheran, nan pagawason gyud ka nila sa pultahan. Unsa na ma’y nagakahitabo? Sa panahon mismo nga angay unta kitang nagapahimutang na og mga anak, pero unsa ma’y nagakahitabo? Nanagdawat hinoon sila og lahi nga butang, tungod kay wala man sila nahibalo sa tinago sa Dios. Ug dili gayud nila Kini mahibaloan pinaagi sa usa ka seminaryo!

⁹⁹ Aduna lang ko’y basahon para kaninyo. Okey lang ba? Sige. Moabli kita, aduna man ko’y gisulat dinhi. Atong hibaloon kung giunsa ni Pablo . . . Karon, dinhi, ania ang maong magtutudlo niini nga Mensahe. Moadto sà kita sa Mga Buhat 9:5, sa makadiyut. Paminawa n’yo kung sa unsang paagi nga naangkon ni Pablo kini nga Kapadayagan, kung unsa ba’y nahitabo kaniadto. Karon, diha sa Mga Buhat 9 sugdan nato ang pagbasa, nga ingon niini. Usa man kini ka pang-Sunday school nga pagtuon, busa nganong dili—nganong dili man nato basahon kini? Pahibaloa ra ako kon wala ako sa . . . ? . . .

Apan si Saulo, samtang nga nagapangusmo pa sa paghulga . . . (Oh, kadtong tawong agilahong ilong, masuk-anon kaayo, og mabagison nga Judio!) . . . sa mga pagpamatay batok sa mga tinun-an sa Ginoo, miadto sa labaw’ng sacerdote,

Ug nangayo kaniya og mga sulat ngadto sa sinagoga sa Damasco, aron nga kung may hingkit-an siya . . .

¹⁰⁰ “Moadto ako ug pangitaon ko sila! Kung makit-an ko lang gyud sila, aba, ambot lang kung unsa ang mabuhat ko kanila!” Kita n’yo? “Kung makit-an ko gayud sila!” Apan siya’y gipili na mang daan!

¹⁰¹ Unsaon man ninyo pagpakahibalo kon ang tigpayuhot og bino dinhi dili pinili-nang-daan ngadto sa Kinabuhi? Unsaon man ninyo pagpakahibalo kon kanang luoy’ng bigaon diha sa dalan nga dili gani ninyo gustong istoryahon, unsaon man ninyo pagpakahibalo kon ang yanong pagpakiglamano ug pagdapit

kaniya ngadto sa simbahan dili makapahimo kaniyang usa ka balaan sa Dios, didto sa Himaya? Sa dihang... Unsaon man ninyo pagpakahibalo kon siya ba'y dili mamaingon niana? Mao kana ang wala nato mahibalo-i. Apan katungdanan nato kana. Sama sa usa ka mangingisda nga gitambog ang pukot ngadto sa dagat ug sa pagbira na niya, dunay nakuha nga mga baki, isda, mga taluto, mga damang sa tubig, ug tanan nang uban pa, pero ang uban niadto mga isda man. Wala siya kahibalo, basta gitambog lang niya ang maong pukot. Ingon niana pud ang ginabuhat nato. Matikdi n'yo si Pablo.

... nangayo og mga sulat ngadto sa mga sinagoga sa Damasco, aron nga kung may hingkit-an siya nga uban sa maong dalan, mga lalaki o mga babaye, iyang gapuson sila ug dalhon sila ngadto sa Jerusalem. (Igsoon, siya'y mabagison gayud!)

Ug sa nagalakat pa siya, sa nagsingabot siya sa Damasco: ug sa kalit gisidlakan siya sa palibot niya...

¹⁰² “Dunay miabot nga usa ka sa sacerdote diha sa dalan, si Doktor F. F. Jones, ug miingon kaniya, ‘Nagkinahanglan ka pa karon og usa—usa ka pang-seminaryong kasinatian, anak, ug nagatoo ko nga mahimo kang gamiton sa Dios.’” Dili ba pagkangil-ad tan-awon niana nga Kasulatan, nga makabasa og ingon niana? Karon, ingon gayud kana ka klaro... wala ko baya ginasulti kana para magpakatawa. Pero kana'y, para nato, ingon gayud kana ka klaro nga masabtan nato sa karong panahon. “Abi nimo, maayong babaye man ang imong inahan, mao nga nagatoo ko nga mamahimo gyud kang usa ka maayo nga magwawali.” Matikdi n'yo kung unsa ang nahitabo.

Ug sa—sa nagalakat pa siya, sa nagsingabot siya sa Damasco: ug sa kalit gisidlakan siya sa palibot niya, sa usa ka kahayag... (Whew, misugod nga supernatural!)... usa ka kahayag gikan sa langit:

Ug natumba siya sa yuta, ug hingdunggan niya ang usa ka tingog nga nagaingon... Saulo, Saulo, nganong ginalutos mo ako?

Ug siya miingon, Kinsa ka ba, Ginoo? Ug miingon ngadto kaniya ang Ginoo, Ako mao si Jesus nga ginalutos mo: ug nga malisud kanimo ang pagtindak sa mga espuela.

Ug siya nangurog ug hingkulbaan gyud siya ug miingon, Ginoo, unsa ba ang buut mo nga akong... pagabuhaton? Ug miingon kaniya ang Ginoo, Bumanganon ka, ug sumulod sa siyudad, ug igaingon kanimo ang imong kinahanglan nga pagabuhaton.

¹⁰³ Ug kadtong mga kalalaken-an nga kauban niya sa pagpanaw, nanagpadayon ra, ug hingkaplagan nila ang usa

ka lalaki. Si Ananias, nga atua didto, nga nakakita og panan-awon. Ang tanan supernatural gayud! Ug ang luoy'ng si Saulo, kadtong mabagison nga lalaki! Kining si Ananias nakakita og panan-awon, nakakita sulod sa iyang balay. Usa siya ka propeta, nga nagaampo sulod sa iyang balay, ug nakakita siya og panan-awon. Siya . . . Nakigsulti kaniya ang Ginoo ug miingon, “Adunay lalaki nga nagalakaw didto sa dalan, nga ingon gyud ka buta sama sa kabog, ug ang iyang ngalan mao si Saulo, siya mao si Saulo nga taga-Tarsus.”

¹⁰⁴ Miingon siya, “Ginoo, daghan na ako’y nadungog nga grabeng mga butang. Ayaw ako paadtoa, usa ra ako ka yanong tawo. Ayaw ako paadtoa kaniya.”

¹⁰⁵ Ingon Niya, “Apan, ania, siya nga nagapadulong na, gipakita Ko kaniya ang usa ka panan-awon. Nagpakita Ako kaniya diha sa Haligi nga Kalayo. Gibutahan Ko siya. Ug gikinahanglan Ko man ùnang butahan siya ug ipapukan siya sa dili pa Nako siya mahimo nga unsa man. Kita mo, gikinahanglan Kong watas-watson ang iyang teolohiya. Kabalo ka, siya’y—siya’y—usa baya siya ka bantugang tawo sa usa sa mga iglesia didto. Aduna siya’y tanan na nga matang sa mga digri, ngani dili na niya kinahanglang magpakahanas pa sa bisan unsa man, apan,” ingon sa Ginoo, “ang gikinahanglan Kong buhaton mao ang wagtangon sà kadtong tanan kaniya.”

¹⁰⁶ Mao kana ang punto. Dili nga magdugang pa kaniya, kondili wagtangon kadto kaniya. Sa tan-aw ko mao kana’y problema sa kadaghanan sa atong mga ministro karong panahona; pangwagtangon kini gikan kaninyo, aron nga mapahimutang sa Dios ang Balaang Espiritu diha sa kinasuloran nila. Wagtangon pagawas! Didto, siya miingon nga ang maong lalaki kono . . .

¹⁰⁷ Ug ingon siya, “Ginoo, apan kini—kini—kini nga lalaki usa man ka makahahadlok nga tawo.”

¹⁰⁸ Ingon Niya, “Apan, ania, nagaampo na siya. Karon, aduna ka’y agian nga usa ka dalan ug makadangat ka ngadto sa usa ka tuboran. Molabay ka sa maong tuboran sa may wala nga bahin, ug monaug ka. Aduna didto’y puti nga balay, umadto ka ug panuktok sa pultahan. Atua lang siya sa may pasilyo, didto lang man siya kutob gidala nila. Ipandong ang imong mga kamot diha kaniya, dalha siya didto sa suba sa Damasco ug bautismohi siya sa Ngalan ni Jesus. Tungod kay, sultihan Tà ka sa Akong pagabuhaton, daghang mga butang ang kinahanglan niyang antuson tungod Kanako, kay siya man ang Akong mensahero ngadto sa mga Gentil.” Amen!

¹⁰⁹ “Bueno, karon, kadali lang, Ginoo! Karon, unsa man nga tulonghaan ang akong ipa-eskuwela kaniya?” Sultihan ko kamo sa atong buhaton, basahon sà nato ang Mga Taga-Galacia ug hibaloon tà. Ang sunod—sunod dayon nga kapitulo dinha. Atong tan-awon ang Mga Taga-Galacia 1, ug magsugod sa ika-10 nga

bersekulo, ug atong hibaloong kung unsa nga tulonghaan ang gieskwelahan ni Pablo kaniadto, kung unsa nga seminaryo, ug kang kinsang mga kamot ang gipandong diha kaniya, ug oh, ang tanan nga nahitabo. Mga Taga-Galacia sa ika-1 nga kapitulo. Aron makadaginot ta og oras, magsugod ta mahitungod na sa iyang pagkakabig, diha sa ika-10 nga bersekulo.

Kay gipangita ko ba karon ang kahimuot sa mga tawo, o sa Dios? o naninguha ba ako sa pagpahimuot sa mga tawo? kay kung naninguha pa ako sa pagpahimuot sa mga tawo, dili unta ako maulipon ni Cristo.

¹¹⁰ Oh, grabe, grabe, grabe! Buut ko lang nga isulti ang diyutay'ng butang adisir pa kini dinhi. Mga Taga-Galacia 1, basahon ta ang ika-8 nga kapitulo. Pila man ang nasayod nga si Pablo kadtong nag-aghat niadtong mga tawo nga magpabautismo pag-usab sa Ngalan ni Jesus, Mga Buhat 19? Tinuod gyud. Atong basahon ang dinhi sa may ibabaw, sa ika-8—sa ika-8 nga bersekulo.

. . . bisan pa kon kami, o usa ba ka manulonda nga gikan sa langit, magawali nganha kaninyo og lain nga maayong balita nga lahi kay sa amo nang gikawali, ipatunglo siya.

¹¹¹ Asa mo man nakuha kini nga Ebanghelyo, Pablo? Sa ika-9 nga bersekulo.

. . . sa amo nang gikaingon kaniadto, usbon ko karon ang pag-ingon, Kung may tawo nga magawali nganha kaninyo og maayong balita nga lahi kay sa inyo nang nadungog, og nadawat, ipatunglo siya.

¹¹² Kung siya ma'y usa ka arkanghel, kung siya ma'y usa ka obispo, kung siya ma'y usa ka pangkadaghanang tigdumala, kung siya man si Doktor *Ingon niani-ug-ingon niana*, o kung kinsa man siya, kung dili gani niya ginawali ang bautismo sa tubig sa Ngalan ni Jesus Cristo, dili ginawali ang bautismo sa Espiritu Santo, ang pagpasig-uli sa mga gasa, ang Pag-abot ni Cristo, og ang tanan niining mga butanga, nan ipatunglo siya! Kung sulayan man niyang gamiton ang bisan unsa niini nga Pulong ug moingon nga para ra kini sa laing panahon ug ihilambigit kini sa kung unsa nga bag-ong walay-pulos nga ideya nga natun-an nato gikan sa usa ka seminaryo, nan ipatunglo siya!

¹¹³ Padayon ta sa pagbasa, og hibaloong kung giunsa ni Pablo pagkaangkon niini, hibaloong kung giunsa, og kung unsa gayud ang gipaningkamotan kong isulti kaninyo niining buntaga.

Kay gipangita ko ba karon ang kahimuot sa mga tawo, o sa Dios? o naninguha ba ako sa pagpahimuot sa mga tawo? kay kung nagapahimuot pa ako sa mga tawo, nan dili unta ako maulipon ni Cristo.

114 Aduna pa ba akong ubang lauman, unsa pa ba'y lauman sa usa ka tawo nga nahigugma sa Dios, ug ilabina, og usa ka magwawali, aduna pa ba siya'y ubang lauman gawas sa pagadumtan sa tawo? Pagadumtan gyud ka sa mga tawo. Bueno, ingon nila . . . miingon si Jesus, "Kung ginatawag nila Ako, nga Agalon sa balay. . . Ako mao ang Agalon, ang pinakahalangdon kaninyong tanan. Ako Mao ang makabuhay og mas daghang mga milagro ug mas makapamuhay pinaagi sa Balaang Espiritu kay sa kaninyong tanan, tungod kay ania man Kanako ang bug-os Kong kahupnganan. Ug kung gitawag nila Ako nga 'Beelzebub,' unsa pa kaha ka mas grabe ang itawag nila kaninyo? Apan," ingon pa, "ayaw ninyo'g hunahunaa kung unsay inyong igasulti, kay dili man kamo mao ang magasulti, kondili ang Amahan nga nagapuyo sa sulod ninyo, ang magasulti nianang higayona. Basta magpabilin lang mismo sa Pulong." Ug Siya, sa dihang nahuman na Niyang isulat ang Basahon, miingon Siya, "Ang si kinsa mang tawo nga magataktak og usa ka Pulong gikan Niini nga Basahon o magadugang og usa ka pulong ngadto Niini, siya pagataktakon gikan sa Basahon sa Kinabuhi, siya mismo." Tabangan unta kita sa Dios nga magpabilin gyud mismo Niini!

115 Karon ang sunod nga bersekulo, basahon ko na karon, akong basahon sa ingon ka dali.

Kay ako nagamantala . . . (Ingon nga kini, ang magadala kaninyo sa Paghukom.) ako nagamantala kaninyo, mga igsoon, mahatungod sa maayong balita nga giwali ko nga kini wala magagikan sa tawo.

"Karon, dili ako Methodist, Baptist, Presbyterian, o Pentecostal man; wala kini magagikan sa tawo. Dili usab . . ."

Kay wala ko kini dawata gikan sa tawo, wala gani itudlo kanako, . . .

116 "Wala ko kini dawata gikan sa tawo, dili seminaryo, dili doktor, dili sa divinidad, dili pud sa tulonghaan sa edukasyon. Wala ko gayud kini madawat sa ingon nianang paagi, wala sàb kini gikatudlo kanako sa ingon-anang paagi, wala ko kini hingkaplagi sa ingon-anang paagi, wala kini miabot kanako sa ingon-anang paagi." Kung ingon-niana sa unsa mang paagi kini miabot, Pablo?

. . . ikatudlo kini, kondili pinaagi sa pagpadayag ni Jesus Cristo.

117 "Kaniadtong gipadayag ni Cristo ang Iyang Kaugalingon nganhi kanako, nga Siya mao ang Anak sa Dios, kaniadtong mikunsad kanako ang Haligi nga Kalayo niadtong adlaw, ingon ko, 'Kinsa Ka ba, Ginoo?' Siya miingon, 'Ako mao si Jesus.'"

118 Karon, akong ipakita kaninyo kung unsa—kung unsa ang nahitabo kaniya kaniadto. Bueno, sa karon kung adunay kasinatian ang usa ka tawo, nan gusto nilang hatagan siya og

napulo pa ka tuig para magtuon og Griyego, ug napulo pa ka tuig nga magtuon og uban pang butang, ug nianang panahona mitaliwan na siya. Ania.

...wala kini dawata gikan sa tawo, wala gani itudlo kanako, kondili pinaagi sa pagpadayag ni Jesus Cristo.

Kay kamo nakadungog na mahitungod sa akong mga pagkinabuhi kaniadtong mga panahon diha sa tinoohan sa mga Judio, . . .

¹¹⁹ “Usa ako ka bantugang doktor kaniadto, aba. Mao gayud.” Gikatudloan siya ilalum ni Gamaliel, ang pinakahataas nga magtutudlo nga aduna sila sa yuta kaniadto. Pila man ang nasayod nga si Gamaliel ang usa sa bantugan, pinakabantugan nga mga magtutudlo? Oo, sir. “Ang akong relihiyong Judio, aba, aduna ako niadto; hingsayran ko gayud tanan ang pagsaulo og Kredo sa mga Apostoles ug tanan niadtong mga butanga, nakita n’yo. Hingsayran ko usab ang pagsaulo sa tanang pang-buntag nga mga pag-ampo ug ang pagpanalangin sa mga tawo.” Kita n’yo?

...kon giunsa ko sa paglutos sa hilabihan gayud kaniadto ang iglesia sa Dios, ug gilaglag ko kini:

“Kon giunsa ko sa pagpaningkamot nga paundangon kadtong pundok sa mga holy roller!” Kita n’yo? Kita n’yo na?

Ug hilumbaan ko sulod sa tinoohan sa mga Judio. . .

¹²⁰ “Usa ako ka bantugan nga tawo kaniadto. Aba, ako gayu’y . . .hilumbaan ko, gipakita ko kanila nga mahimo ko silang papason, tungod kay nagpamatay man ako og mga Esteban ug daghan pang mga butang nga nabuhat ko. Kita n’yo na kung unsa ang nabuhat ko!” Daw sa unsa nga nanglutos siya sa hilabihan gayud!

Hilumbaan ko sulod sa tinoohan sa mga Judio ang daghanan sa mga talirungan ko sa panuigon sa akong mismong lungsod, nga sa hilabihan ako masibuton gayud alang sa mga gikabilinbilin nga kalagdaan sa ilang mga ginikanan.

¹²¹ Karon, hinumdumi n’yo, dili ang Pulong sa Dios kondili, “ang tradisyon sa mga ginikanan,” tradisyon sa iglesia, sa laing pagkasulti. “Sa hunahuna ko Methodist gayud ako sa kinasuloran, Baptist gayud ako sa kinasuloran, Pentecostal gayud ako sa kinasuloran.” Oh, mao ba? Pero ang ginatinguha ko nga mamahimong iya gayud sa Dios sa kinasuloran. Oo, ingon niana. Kita n’yo? Bueno.

...kalagdaan sa akong mga ginikanan.

Apan sa nahimut-an sa Dios, . . .(oh, oh, Pablo, ania ka na) . . .nga mao’y naggahin kanako sa diha pa ako sa tiyan sa akong inahan, nga naghimugso kanako dinhi

niining kalibutana, ug nagtawag kanako pinaagi sa
iyang grasya,

Sa pagpadayag sa iyang Anak nganhi kanako, . . .

¹²² Sa unsa man kana nga paagi? “Ang Balaang Espiritu nganhi kanako! Nahimut-an sa Dios nga pilion ako, nga gihimulag ako sa tagoangkan pa lang, ug naghatag kanako sa Anak, nga mao ang Espiritu Santo diha sa porma nga Espiritu, nganhi kanako, aron ipadayag ang Iyang Kaugalingon nganhi kanako.” Oh, grabe! Whew! Ako—ako—sa hunahuna ko kasinggiton gyud ako.

¹²³ Ania, sultihan tà ka, igsoon. Sa nahimut-an sa Dios! Oh, alleluyah! Sa nahimut-an sa Dios! Usa ka palahubog ang amahan. Ang inahan . . . panalanginan ka sa Dios, mama, wala ko’y unsa man nga isulti batok kanimo. Apan ang usa ka inahan nga walay nahibaloan mahitungod sa Dios sama sa usa ka rabbit nga walay nahibaloan mahitungod sa sapatos nga pang-niyebe. Ug usa ka amahan nga nagbuy-od pirmi sa kahubog diha sa kadalanan. Ug ako nga wala gani og sapatos nga masul-ob kaniadto para mag-eskuwela, ug hataas pa ang buhok nga kutob sa akong liog, ug ayaw pa sa tanan kanako tungod nga usa ako ka taga-Kentucky nga nahianhi sa Indiana. Ug daw sa unsa, oh, daw sa unsa ka luod nga talan-awon. Apan nahimut-an mismo sa Dios! Amen! Nahimut-an sa Dios, Nga nagpinig kanako gikan pa sa tagoangkan sa akong inahan, aron Iyang maipadayag ang Iyang Anak nganhi kanako, pinaagi sa pagkahimong usa ka ministro sa Pulong, nga magpabilin mismo Niini, nga magpakita og mga panan-awon ug mga ilhanan ug mga katingalahan ug mga milagro. Ug, oh, grabe!

¹²⁴ Nasabtan n’yo ba kung unsay Iyang ginasulti? Nahimut-an gayud sa Dios nga buhaton kadto! Sa unsa mang paagi? Paminaw mo og ayo. “Aron sa pag- . . .” Basahon tà karon ang ika-16 nga bersekulo.

Sa pagpadayag sa iyang Anak nganhi kanako, aron igawali ko siya sa taliwala sa mga pagano; sa gilayon wala ako magpakisayod sa iglesia:

¹²⁵ “Wala ako miadto sa kinsa man nga obispo ug nangutana kaniya kung unsa ang angay kong buhaton. Wala ako miadto sa unsa man nga unod ug dugo, sa unsa man nga mga organisasyon o unsa pa man. Wala ako’y unsa man nga kahilambigitan kanila. Wala ako nakighisgot sa unod ug dugo. Ni miadto man ako sa Jerusalem ngadto sa tanang halangdon og balaan nga mga sacerdote ug sa balaang mga amahan, ug tanan na niadto, ug miingon, ‘Karon, kabalo mo, aduna ako’y panan-awon, unsa man ang angay kong buhaton mahitungod niini? Nakita ko ang mapanalanginong Ginoong Jesus diha sa usa ka panan-awon.’ Miingon gyud siguro sila, ‘Pahawa dinhi, ikaw! Unsa ma’y . . . Ikaw nga holy roller! Bueno, unsa ba’y nahitabo kanimo?’ Pero

wala, tungod aduna na man ko og tanan nilang mga digri sa sugod pa lang. Aduna na. . .”

¹²⁶ Ug miingon si Pablo dinhi, mahimo kong ipakita kaninyo sa Kasulatan, diin miingon siya nga gikinahanglan niyang hikalimtan ang tanan-tanan nga iyang nakat-onan, ug pagaisipon kadto nga walay-pulos, aron nga maila niya si Cristo. Oh!

Ni moadto ako sa Jerusalem ngadto kanila nga mga apostoles nga una pa kanako; kondili miadto hinoon ako sa Arabia, ug mibalik pag-usab sa Damasco.

Ug tapus sa tulo ka tuig mitungas ako ngadto sa Jerusalem aron sa pagpakigkita kang Pedro, ug mipabilin ako uban kaniya sulod sa napulo ug lima ka adlaw.

¹²⁷ Ug sa pagpadayon nato og basa, atong mahibaloan nga siya ug si apostol Pedro wala pa diay sukad-sukad nagkahimamat sa tibuk nilang kinabuhi, wala pa nagkailhanay sa usa’g usa, wala pa pud sukad nagkita sa usa’g usa, apan sa diha nga nagkatagbo na sila mao ra nga Maayong Balita ang ilang ginawali. Aduna gyu’y eskwelahan ang Dios. Kita n’yo? Oo!

¹²⁸ Atua pud kaniadto si Pedro, nga nagtindog sa Adlaw sa Pentecostes, og miingon, “Maghinulsol kamo, ang matag usa kaninyo, magpabautismo kamo sa Ngalan ni Jesus Cristo, alang sa kapasayloan sa inyong mga sala, og madawat ninyo ang gasa nga Espiritu Santo.”

¹²⁹ Miingon sàb si Felipe, “Oh, pagkamahimayaon niini! Kinahanglan nga aduna ako’y buhaton usab. Didto sa. . . aduna ma’y pagtawag kanako didto sa Samaria.” Miadto siya didto ug nagpamatuod sa kadalanan. Sa kalit, dunay usa ka tawong masakiton ang miduol, og gipandongan niya sa iyang mga kamot ang maong masakiton, ug misugod kining naglukso-lukso ug nag-ambak-ambak. Miingon, “Himaya sa Dios, ania na!” Misugod na dayon sa pagpahigayon og dakung panagtigum. Ingon siya, “Gikinahanglan n’yong tanan ang Espiritu Santo.” Ingon siya, “Ang kinahanglan n’yong buhaton, kinahanglan ninyong magpabautismo sa Ngalan ni Jesus.” Busa gidala niya sila didto, ang matag usa kanila, ug gibautismohan silang tanan sa Ngalan ni Jesus. Miingon, “Umari ka, Pedro, ipandong mo na ang imong mga kamot diha kanila karon.” Ug nadawat nila ang Espiritu Santo.

Si Pedro, didto sa balay ni Cornelio, mao sàb gihapon.

¹³⁰ Pero si Pablo wala pa gyud sukad nakakita kaniya o may nadungog man nga bisan unsa mahitungod kaniya. Apan sa nalatas na niya ang kayutaan ibabaw sa Efeso, ug didto natagbo niya ang pipila ka mga tinun-an. Nahibalag niya ang usa ka Baptist nga magwawali, siya mao, si Apolos, nga usa ka nakabig

nga abogado, maalamon, utokan, iyang ginagamit ang Daang Tugon ug nagapamatuod pinaagi Niini nga si Jesus mao ang Anak sa Dios. Oo, sir, usa siya ka maalamon nga tawo. Ug nanagsinggit sila, nanagkalipay sila. Mao kana ang ginaingon sa Biblia. Basaha n'yo ang ika-18 ug ika-19 nga kapitulo sa Mga Buhat ug tan-awa n'yo kung dili ba kana husto. Nanagkalipay sila, nanagsayaw sila diha sa Espiritu, ug nagadagan-dagan, kabalo mo. Miingon si Pablo, "Apan nadawat na ba ninyo ang Espiritu Santo sukad nga mitoo kamo?"

¹³¹ Ug kaninyo nga mga kaigsoonang Baptist nga gapaningkamot nga ipatulon kana sa mga tawo, ug miingon nga ang ingon kono sa orihinal nga Griyego, "Nakadawat na ba kamo sa Espiritu Santo sukad, o *sa diha* nga mitoo kamo?" Nan ginahagit ko kamo nga dalhon n'yo kanako ang Griyego! Aduna ako mismo og orihinal nga Griyego. Aduna usab ko'y Aramaic, ug Hebreohanon, usab. Ang ginaingon gyud sa matag usa niini, "Nadawat na ba ninyo ang Espiritu Santo *sukad* nga mitoo kamo?"

¹³² "Pinaagi og pagtoo kamo naluwas," kana mao ang inyong pagtoo sa Dios. Ang Dugo ang maoy nagapapabilin kaninyo nga limpyo gikan sa sala, tungod kay nagahimo man kini og halad. Dili ang Dugo ang nagaluwas kaninyo, kondili ang Dugo ang nagapapabilin kaninyo nga limpyo. Sa unsang paagi ba kamo naluwas? "Pinaagi og pagtoo kamo naluwas," ug pinaagi sa pagkahibalo-nang-daan sa Dios, mao nga kamo ginatawag. Luwas na kamo, ug ang Dugo ingon nga maoy pangbayad-sa-sala, ang padayon nga nagapapabilin kaninyo nga limpyo. Ug dayon pinaagi sa usa ka Espiritu gibautismohan kamo pasulod ngadto sa Espiritu Santo, ngadto sa pagpakig-fellowship sa mga magtotoo, ug ngadto sa pagpakig-fellowship sa Balaang Espiritu, aron mapangunahan sa Espiritu, nga nagapamuhat og mga ilhanan, og mga katingalahan.

¹³³ Kadali lang, paingon na tà, aduna lang ko'y ginahulat, pero sa makadiyut na lang makadangat na kita niini, nagalaum ko nga makadangat gyud tà bisan pa man. Nagsulti man ko ninyo nga mosinyas ra mo kanako pag ingon-aning orasa na, dili ba? Nahitabo man gud nga nakatan-aw ko sa oras. Pero usa na lang—usa na lang ka pulong o duha pa. Usa lang. . .Kini'y—gamay na lang kini.

¹³⁴ Hangtud kanus-a man magalungtad kini nga kaluwasan, unsa ba ka dugay? Unsa man kini nga matang sa kaluwasan? Gikan ba sa usa ka iglesia ngadto sa usa pa ka iglesia? Gikan sa. . .Atong ablihan sa Mga Hebreohanon 9:11, sa makadiyut, ato lang—lang tan-awon kung unsa ba ka dugay, sulod sa pipila ka minuto. Ablihi n'yo sa Basahon sa Mga Hebreohanon ug atong—atong hibaloon kon hangtud kanus-a ba magalungtad kini nga kaluwasan. Hibaloon pud kung unsa

nga matang kini nga kaluwasan. Atong basahon karon ang Mga Hebreohanon 9:11.

Apan si Cristo nga nahimong usa ka labaw'ng sacerdote sa mga maayong butang nga palaaboton, pinaagi sa labing daku ug labing hingpit nga tabernaculo, nga dili binuhat sa mga kamot, sa ato pa, . . . (Buena kini ang mao ra gihapon nga magtutudlo, si Pablo, kita n'yo). . .dili sa pagkabuhat. . .niining pagkabuhata;

Dili usab pinaagi sa dugo sa mga kanding ni sa mga nating vaca, kondili pinaagi sa iyang kaugalingong dugo nga misulod sa makausa nga sa gihapon (pila kono ka higayon? Makausa!) ngadto sa dapit nga balaan, sa nakab-ot niya ang . . . (kaluwasan ba nga sulod sa usa ra ka semana, kaluwasan ba nga hangtud sa sunod ra nga rebaybal? Unsa man nga matang?) . . .walay-katapusan nga katubsananan para kanato.

¹³⁵ Unsa ba ang buut ipasabot sa pulong nga “Walay-Katapusan”? Diha kang Cristo, human nga ako mitoo . . . Walay si kinsa man nga makatawag kang Jesus nga, “Cristo,” kondili pinaagi lamang sa Espiritu Santo. Busa adunay tulo ka matang sa mga tawo: mga dili-magtotoo, mga nagpatoo-too, ug mga magtotoo. Apan sila nga mga nanagpanoo ngadto sa Kinabuhing Walay Katapusan, nakasulod na sa mga sawang.

¹³⁶ Hisgotan sa nato ang daang tabernakulo, unsa ba ang unang butang nga ilang ginabuhat kaniadto? Misulod sa mga sawang, ang Gentil. Ang sunod mao ang tumbagang halaran, kon diin nila ginahugasan ang halad diha sa bulawan nga dolang. Ang sunod mao ang pagpatay sa halad, ug ang pagwisik-wisik sa dugo diha sa halaran. Dayon, kausa sa usa ka tuig, ginadihogan si Aaron, oh, (og unsa man?) og pahumot nga Rosa sa Saron, og hamili nga lana nga dunay pahumot, ila kadtong ginabubo sa iyang ulo, og nagadagayday kadto hangtud sa mga sidsid sa iyang bisti. Matikdi n'yo kung unsa nga gikinahanglan sa niining tawo nga moadto mismo sa luyo niadtong mga tabil, kausa sa usa ka tuig, nga dala ang dugo sa iyang atubangan para sa Halaran sa Kalooy. Ug usa niadto ka tuig gidala niya ang iyang sungkod ug nahikalimtan kadto. Sa pagbalik nila aron kuhaon kadto, nanalingsing na kadto ug namulak. Usa ka karaang sungkod nga dala-dala niya tingali sulod sa kuwarenta na ka tuig didto sa kamingawan, ang nabilin sulod niadtong Balaan nga Dapit! Matikdi, sa dihang gikuha nila kadtong dugo sa pakigsaad, pinaagi sa maong dugo, siya gidihogan. Ug nagasul-ob siya og bisti nga dunay mga gagmay'ng kampanya nga nagatunog, usa ka prutas nga granada ug usa ka kampanya. Ug ang maong tawo kinahanglang molakaw sa paagi nga sa matag higayon nga ilihok niya ang iyang tiil, ug molihok nga nakaingon *niini* ug pag motikang siya, nagaawit sila og “Balaan, balaan, balaan, ngadto

sa Ginoo. Balaan, balaan, balaan, ngadto sa Ginoo. Balaan, balaan, balaan, ngadto sa Ginoo.” Oh, pagkanindot gyud!

¹³⁷ Unsa ba ang ginasulti ko? Patalinghugi n’yo Kini, Branham Tabernacle! Nagkaaduna na kamo’y kahigayonan. Pag ang usa ka tawo nga sa makausa nadihogan sa Espiritu Santo, aron sagoapon pasulod ngadto sa pamilya sa Dios, aron maipuwesto na sa Amahan, ug maipahimutang dinhi alang sa pag-alagad, alang sa katuyoan sa iyang kinabuhi, o para sa unsa nga gitawag siya sa Dios, nan ang iyang pagkinabuhi angay gayud nga mamahimong ingon-ini “Balaan, balaan, balaan, ngadto sa Ginoo. Balaan, balaan, balaan!”

“Oh, kinahanglan mong modapig *dinhi* ug mamahimong . . .”

“Balaan, balaan, balaan, ngadto sa Ginoo.”

“Oh, kinahanglan baya nimong toohan ang tanang gisulti sa elder bahin, *nini*.”

¹³⁸ Apan, “Balaan, balaan, balaan, ngadto sa Ginoo.” Ang Iyang Pulong gyud ang kinahanglan nga mauna, kinahanglan nga ang tanan-tanan Niini, motuhop, og mapahiluna gayud sa inyong kasingkasing! Ang inyong pagkinabuhi kinahanglan nga nahiuyon gyud sa Pulong. “Balaan, balaan, balaan, ngadto sa Ginoo.”

¹³⁹ “Oh, kung motambong ka lang dinhi! Sultihan tà ka kung unsay among buhaton, mag-organisa kami, og himoon ka namong miyembro sa among organisasyon, mamahimo ka nang usa ka halangdon nga tawo.”

¹⁴⁰ “Balaan, balaan, balaan, ngadto sa Ginoo. Balaan, balaan, balaan, ngadto sa Ginoo,” magpadayon lang, wala gyu’y unsa man nga kalahian kung unsay ginasulti ni kinsa man, nga kono bakwion ko kini nga mga teyp.

¹⁴¹ “Buhata ang *ingon-ani*, buhata ang *ingon-ani*, buhata ang *ingon-ana*, buhata ang *ingon-ana*, o ang *uban pa*.”

¹⁴² “Balaan, balaan, balaan, ngadto sa Ginoo.” Nakasentro na gyud ang imong mga mata ngadto sa Kalbaryo, ug walay bisan unsa man ang makapahunong kanimong! Ang mismong paglakaw mo sa imong kinabuhi, nagalakaw ka diha sa Dakung-dalan sa Hari, nga dinihogan sa hamiling Lana nga igdidihog, pasulod ngadto sa Labing Balaan sa mga balaan. Whew! Amen. Bueno.

¹⁴³ Ang ingon ni Pablo nga wala niya kono Kini nadawat gikan sa tawo. Karon unsa man ang ginasulti niya, ngadto sa Mga Taga-Galacia, diha sa atong leksyon? “Nga gipahibalo kanato ang tinago sa Iyang kabubut-on.” Unsa ba ang Iyang kabubut-on? “Gipahibalo ang mga tinago sa Iyang kabubut-on.” Kaninyo nga nagasulat, ika-9 nga bersekulo kini. Karon dalion ko na mismo ug hisgotan na kini, tungod kay naudtohan na gyud tà.

¹⁴⁴ Oh, ang matag Pulong usa gayud ka...?. . . Oh, ang matag Pulong usa gyud ka bulawanong bahin. Mahimo mo Kining kuhaon ug pasinawon mo Kini ug pasinawon. Mahimo mong kalkalon, mahimo kong. . . Mahimo mong hisgotan ang usa sa niining mga Pulong dinha, ipatakdo kini diha sa Genesis ug pasinawon kini, hisgotan kini diha sa Exodo ug pasinawon na usab kini, mahimo mong hisgotan kini diha sa Levitico ug pasinawon na usab kini, ug, sa higayon nga makadangat ka na sa Pinadayag, si Jesus mismo ang matag tipik Niini! Amen. Mahimo mo kining pasinawon kutob sa gusto mo, si Jesus gyud gihapon kini pagmodangat ka na—pagmodangat ka na sa Pinadayag. Kay, Siya miingon man, “Ako Mao ang Kaniadto, Ang Karon, ug Ang Umalabot. Ako mao ang Gamut ug Kaliwat ni David, ang Bitoon sa Kabuntagon. Ako mao ang Alfa, Omega.” Kana mao’y A ug Z sa alpabetong Griyego. “Ako mao ang A hangtud sa Z. AKO MAO! Ako gayud ang Tanan-tanan.” Tinuod. “Ako Mao ang nabuhi ug namatay, ug buhi hangtud sa kahangturan. Ania Kanako ang mga yawi sa kamatayon ug impierno.” Oh, my! Ang matag bulawanong bahin nga imong hisgotan dinhi ug sugdan mong pasinawon kini, mosinaw gyud kini paingon kang Jesus mismo.

¹⁴⁵ Karon, kadiyut na lang ug dayon kita’y—kita’y—kita’y—kita’y, mohunong na kita. Oo. Unsa pa ba’y atong ginahulat, kung ingon-niana? Para sa unsa man nga ania kamo karon sa panagtigum? Unsa ma’y katuyoan niini? Unsa ma’y hinungdan nga nagaagulo ang kalibutan? Para sa unsa man nga nahilandam na ang bomba atomika, para sa unsa man ang mga molecule ug ang mga atom? Ug, oh, para sa unsa ba ang tanan niini?

¹⁴⁶ Ablihi sà, ang ika-8 sa Mga Taga-Roma, sa makadiyut lang. Kung unsa ma’y ginahulat niini? Unsa ba’y ginahulat niining tanan? Unsa na man ang panahon? Mga Taga-Roma, sa ika-8 nga kapitulo, ug sugdan nato ug basahon sa, oh, ang ingon ko nga sa ikawalo- . . . Magsugod diay tà sa may ikasiyam- . . . sa ika-19 nga bersekulo, ug basahon lang—lang dinhi mismo para mahimo kining—mahimo kining malumo gayud. Husto. Kabalo ko kon asa na kamo mopaingon dinha. Sige. Mga Taga-Roma, sa ika-8 nga kapitulo, sa hunahuna ko kon asa ako karon. Oo, sir. Sa ika-8 nga kapitulo, ug atong sugdan dinhi sa may ika-18 nga bersekulo. Sugdan na lang nato sa ika-14 nga bersekulo.

Kay sumala sa gidaghanon sa mga gipangunahan sa Espiritu sa Dios, kini sila . . . mga anak sa Dios. (Tinuod kana.)

Kay wala kamo makadawat sa espiritu sa pagkaulipon pag-usab ngadto sa kahadlok; . . .

¹⁴⁷ “Oh, makapabilin kaha ko. Oooh, kung makapabilin lang unta ko karon!” Pagpabilin gayud bisan pa man! Dili man ingon

nga kung makapabilin ba ako, kondili kung nagapabilin ba Siya. Anaa na ako Kaniya karon, kita n'yo.

¹⁴⁸ Bueno, moingon mo, “Bueno, kung anaa na unta ako Kaniya!” Karon kamo—kamong mga Presbyterian nagaingon, “Ah, mitoo na man mi Niana sa una pa.” Apan ang inyong kinabuhi nagapamatuod man nga wala gyud kamo mitoo, gawas lang kon ginakinabuhi n'yo ang matang sa kinabuhi nga Iyang gikinabuhi kaniadto, og nagatoo kamo sa mao ra nga Ebanghelyo nga Iyang giwali.

¹⁴⁹ Moingon mo, “Ah,” ingon ang Baptist, “tinuod bitaw, nagatoo ako sa Eternal nga kasiguradohan.” Pero nagagawas lagi ka dinhi ug nagapanigarilyo ug nagaadto sa mga sayawan, ug ginapaputlan sa mga kababayan-an ang ilang buhok, ginapintalan ang ilang mga nawong ug nagalihok nga kung-unsang-na-lang? Ang inyong mga bunga mismo ang nagapamatuod nga wala kamo nagatoo Niini.

Ngani pagmoingon ko, “Nagatoo ba kamo sa Balaanong pagpang-ayo?”

“Oh, ang ingon ni Doktor Jones nga *ingon-ani* kono kini, nga sa nangaging mga panahon pa kini kono.”

¹⁵⁰ Karon, ikaw nga hipokrito! Unsa ba'y nagakahitabo kanimo? Ikaw nga makaluluoy'ng nalimbongan nga bata. Halayo ka na kaayo sa Ebanghelyo hangtud nga ingon ka na ka makaluluoy. Nahitipas ka na dinha sa lapokon nga dalan sa ngadto usa ka nagakasunog nga basurahan. Dili ba nimo makita kung unsay Iyang gisulti dinhi? Nga, ang tanang espiritu nga nagasugid nga si Jesus wala mianhi sa unod karon mismo, mao'y sayup nga espiritu. Ang Biblia miingon nga si Jesus Cristo mao sa gihapon kagahapon, karon, ug hangtud sa kahangturan. Ang gisulti Niya kaniadto, ginasulti Niya gihapon sa karon, tungod Siya ma'y ingon na niana sa una pa. Paminaw lang mo.

Kay wala kamo makadawat sa espiritu sa pagkaulipon pag-usab ngadto sa kahadlok; kondili nakadawat kamo sa Espiritu sa pagka-. . . [Nagaingon ang kongregasyon, “Pagkasinagop.”—Ed.]

¹⁵¹ Karon, pagkahuman nga gisagop na kamo, bueno, pagkahuman nga gisagop na kamo. Nan naipuwesto na kamo, dayon inyo nang nasabtan, human nga gihimo na ang seremonya ug gipahimutang na kamo sa hustong pagkapuwesto ngadto sa Lawas. Anak nga lalaki na kamo, oo, anak nga babaye na kamo, sa dihang natawo na kamo pag-usab, mao kana ang inyong pagkahimugso. Apan karon napahimutang na kamo sa angay n'yong puwesto.

Kita wala makadawat sa espiritu sa. . .kahadlok; kondili nakadawat kita sa Espiritu—nakadawat kita sa Espiritu sa pagkainanak, sa dihang managtuwaw kita

sa pagpangamuyo nga nagaingon, Abba, Amahan. (Nga nagakahulogan og, “Dios ko.” Oo.)

Ang Espiritu sa iyang kaugalingon nagapamatuod sa atong espiritu, nga kita’y—kita’y mga anak sa Dios:

152 Unsaon man pagkahimo niana? Ginaingon ninyo, “Himaya sa Dios! Alleluyah! Dili kana makapabalaka kanako, anak man ko sa Dios,” pero nagagawas lagi mo ug ginabuhat gihapon ang mga butang nga ginabuhat n’yo? Pagabuhaton sa Espiritu sa Dios ang mga buhat sa Dios.

153 Ang ingon ni Jesus, “Ang nagatoo Kanako, ang mga buhat nga Akong ginabuhat pagabuhaton usab niya.” Kita n’yo? Kita n’yo na?

154 Kung—kung—kung—kung kini nga punoan manalingsing ug mamunga kini og usa ka pungpong sa ubas, ug duna na pu’y sunod nga mosalingsing ug mamunga og mga kalabasa, nan aduna gyu’y sayup. Kita n’yo? Sinumbak ra kini nga iglesia, sinumbak ra kini nga sanga, og sinumbak nga tawo. Kung ang usa ka tawo nga dunay denominasyon, miyembro sa usa ka denominasyon ug nagapatawag sa ilang mga kaugalingon nga Cristohanon, pero walay Espiritu Santo ug Gahum sa Dios ug tanan na niining mga butanga. . .

155 Karon, kung mogawas kamo dinhi ug manglihok nga sama niining pundok sa mga hubog, tungod lang kay nagsulti kamo og laing mga pinulongan. Nakakita na ako og mga yawa nga nanagsulti og laing mga pinulongan. Oo, sir. Nakita ko na sila nga nanagsayaw diha sa espiritu, ug nanagsinggit ug nagbula-bula pa ang baba, ug tanan nang uban pa, ug tanan nang ingon-ana. Nakasaksi na ko og ingon-ana. Usa ako. . . pero dili kana ang akong ginapahinungdan. Kondili ang Espiritu mismo sa Dios ang akong ginapahinungdan.

Ang Espiritu sa iyang kaugalingon nagapamatuod sa atong espiritu, nga kita’y. . . mga anak sa Dios:

Ug kung mga anak man, nan mga manununod diay kita; mga manununod sa Dios, . . . isigkamanununod uban kang Cristo; kung matuod. . . nga nagaantus kita uban kaniya, aron nga kita. . . pagahimayaon usab uban kaniya.

Kay giisip ko nga ang pag-antus. . .

156 Paminaw lang mo niini. Oh, tungod pagkaanindot gayud niini!

Kay giisip ko nga ang pag-antus niini nga panahon dili takus ikatandi sa himaya nga igapadayag ra unya kanato—kanato.

Kay ang mainiton nga pagpaabot sa mga binuhat. . .

¹⁵⁷ Duna pu'y ginaingon dinhi, dunay usa ka diyutay'ng—dunay usa ka diyutay'ng pulong dinhi, usa ka gamay'ng sinulat nga pulong dinhi sa daplin sa Biblia nga, “kabuhatan” nga husto sàb, sa Griyego.

...mga pagpaabot sa kabuhatan, ang kabuhatan nagapaabot sa mga pagkapinadayag sa mga anak sa Dios.

¹⁵⁸ Unsa ba ang ginahulat sa tanan-tanan? Unsa ba ang ginahulat sa tibuok kabuhatan? Ang pagkapinadayag sa mga anak sa Dios. Nagahulat kini alang sa Iglesia nga mapahimutang na sa posisyon Niini. Ang anak sa Dios, sa dihang si Adan, asa ba ang iyang ginsakupan? Sa yuta. Siya, duna siya'y kagahum sa yuta. Husto ba? Dili na Siya Elah, Elah, Elohim niadtong higayona; Siya'y si Jehovah na. Kita n'yo? Mao nga, “Ako mao ang Dios, ug nagbuhat Ako og pipila ka mas ubos kay Kanako. Ug gihatagan Ko sila og kagahum. Ug sa ilang ginsakupan, ang ilang ginadumalahan, mao ang yuta.” Adunay kagahum ang tawo sa yuta kaniadto. Ug ang tibuok kabuhatan nagahulat na alang sa mga anak sa Dios nga mahipadayag. Oh!

Ginahulat na nato ang pag-abot nianang malipayong adlaw sa Milenyum,
Sa dihang moabot na ang atong mapanalanginong Ginoo ug ang nagahulat Niyang Pangasaw-onon pagasakgawon na;
Oh, nagaagulo na ang yuta, nagatuaw alang nianang adlaw sa matam-is nga kagawasan,
Sa dihang ang atong Manluluwas mobalik na pag-usab sa yuta.

¹⁵⁹ Husto ba kana? Nagahulat na. Ngani ginapaninguhaan sa Dios nga ipuwesto ang Iyang Iglesia, aron mapadayag ang Iyang Kaugalingon, og makakuha og usa diin Siya makapamuhat nga ingon niini, moingon, “Tan-awa ang Akong Espiritu nga gawasnon nga nagapamuhat. Tan-awa Kini. Sa ingon-ana, sa ingon-ana, Ako—Ako makapamuhat.” Ania, mokuha na pud og usa pa ug ipahimutang usab, “Mahimo Ko usab siyang ipahimutang.” Pagsagop, pagpahimutang, pagpadayag, dalhon siya dinhi ug maghimo og seremonya para kaniya, duawon siya pinaagi og usa ka Manulonda, og sultihan siya og usa ka butang. Karon, kung isulti sàb niya ang tinuod! Kay kung maghimo-himo lang siya og usa ka butang, nan dili gyud kana magpulos. Dili, dili, kana—dili kana magpulos, nagkaaduna na man gud tà og daghang ingon-ana. Apan ang buut kong—ang buut kong ipasabot ang pagkapinadayag gayud sa mga anak sa Dios, pag gipadayag na sa Dios ang Iyang Kaugalingon ug ipadala na Niya siya. Ug dayon moadto na siya, ug ang iyang ginasulti mao ang Kamatuoran. Ang iyang ginabuhat sàb mao ang Kamatuoran. Ang iyang ginabuhat, iyang ginapadayag si Cristo. Pero unsaon n'yo man sa pag-ila kaniya? Tungod sa iyang

pagpabilin sa Pulong, sa Pulong mismo. Kita n'yo, sa ingon-anang paagi n'yo maila ang tanang tawo, pinaagi sa pagpabilin niya sa Pulong. “Kung sila dili managsulti sumala niini nga Pulong, walay Kinabuhi diha kanila,” ingon sa Biblia. Kita n'yo? Biyai ninyo sila.

¹⁶⁰ Karon mobasa pa kita, dayon kita—mohunong na kita, tungod kay pahurot na man gud ang atong oras. Sige, diha sa ika-10 nga bersekulo, o ika-9 nga bersekulo, diay.

Nga iyang gipahibalo nganhi kanato ang tinago mahitungod sa iyang kabubut-on, (ang sagopon kita) sumala sa iyang maayong tuyo nga iyang gituyo diha kaniya:

¹⁶¹ Gituyo Niya Mismo kini, sa wala pa ang pagkatukod sa kalibutan. Pila man ang nakasabot niini? Kita n'yo?

Alang sa usa ka hugna . . .

¹⁶² Oh, my, ania na usab kita! Huh! Oh, atong—atong—laktawan lang sa nato kini, kita n'yo.

. . . usa ka hugna sa kahupnganan sa panahon . . .

¹⁶³ Nagatoo ba kamo sa mga dispensasyon? Mao kini ang ginaingon sa Biblia, “Sa dispensasyon sa kahupnganan sa panahon.” Unsa ba ang kahupnganan sa panahon? Ngani nagkaaduna na man og dispensasyon sa, bueno, aduna kaniadto og dispensasyon sa Kasugoan ni Moises. Aduna kaniadto og dispensasyon ni—ni—ni Juan Bautista. Aduna usab og dispensasyon ni Cristo. Adunay dispensasyon sa organisasyon sa iglesia. Aduna pu'y dispensasyon sa pagbubo sa Balaang Espiritu. Ang sa karon mao na ang dispensasyon sa pagsagop, nga mao'y ginahulat og gina-agulo, sa kalibutan. “Ug sa diha nga moabot na ang kahupnganan sa panahon, ang dispensasyon sa kahupnganan sa panahon,” unsa man ang kahupnganan sa panahon? Sa diha nga mangabanhaw na ang mga patay, sa diha nga matapos na ang balatian, sa diha nga ang. . . sa diha nga mohunong na sa pag-agulo ang tibuok yuta. “Ang kahupnganan sa dispensasyon sa panahon.” Matikdi kini.

Sa diha nga sa usa ka hugna sa kahupnganan sa mga panahon sa pagtigum sa tanan nga mga butang diha kang Cristo, . . .

¹⁶⁴ Dili ba mo malipay? Unsaon man Niya sa pagbuhat niini? Pagatigumon ang tanang mga butang diha kang Kinsa? [Nagaingon ang kongregasyon, “kang Cristo.”—Ed.] Unsaon ba ninyo pagpakasulod diha kang Cristo? [“Pinaagi sa usa ka Espiritu.”] Pinaagi sa usa ka Espiritu kitang tanan gibautismohan ngadto sa [“usa ka Lawas”] usa ka Lawas. Ug kana nga Lawas kang Kinsa man nga Lawas? [“Kang Cristo.”] Nga gihukman na. Ingon nga giako na Niya ang paghukom kanato. Nan unsa na man kita? “Kon makita Ko ang [“Dugo.”]

Dugo, molabay Ako ibabaw kaninyo.” Tungod sa matag higayon nga motan-aw Siya sa Lawas, nga anaa Kini napahimutang dinha, nga dugoan. Anaa ako dinha pinaagi sa unsa? Sa Espiritu Santo. Mao nga nagalabay na lang Siya. Oh, my!

Ug sa diha nga ang kahupnganan sa dispensasyon sa panahon, aron sa *pagtigum . . . sa tanan nga mga butang diha kang Cristo, diha sa langit, . . .*

¹⁶⁵ Karon kung gusto n’yong hisgotan ang mahitungod sa ngalan, nan sugdan na nato kini karon mismo sa makadiyut lang. Ang tanang pamilya sa Langit gipangalanan og unsa man? [Nagaingon ang kongregasyon, “Jesus Cristo.”—Ed.] Ang tanang pamilya sa yuta gipangalanan sàb og unsa? [“Jesus Cristo.”]

¹⁶⁶ Aniyay pipila ka buutan nga mga kababayen-an dinhi, buutan, madagayaon, tinuod nga gining, mga gining. Aduna pud dinha og usa ka Mrs. Branham, Mrs. William Branham, siya mao ang akong asawa. Nagauli siya uban kanako. Kita n’yo, ang tanang uban pa kaninyo nagauban pud sa inyong bana.

¹⁶⁷ Aduna pu’y usa ka halangdong buhi nga Iglesia sa buhi nga Dios, ginadala Niini ang Iyang Ngalan, og puno Kini sa Iyang Espiritu. Husto kana. Wala ko ginasulti . . .

¹⁶⁸ Dili ko ginasaway ang maayong mga buhat, dili ko usab ginasaway ang ilang mga ospital ug mga maayong butang nga ilang ginabuhat. Sa tan-aw ko maanindot man kana, ug mga panalangin pud sa Dios para sa kabus, nagaantus nga katawohan. Dili ko ginasaway kining tanang uban pa nga mga butang nga ilang ginabuhat. Tungod maayo, husto man kana. Ug ang ilang dagkung mga organisasyon ug minilyon nga mga dolyares, sa tinuod lang mas gusto ko pa nga makita kana kaysa mga balay-imnanan diha sa kanto, sa unsa mang higayon. Ginatahud ko gayud sila ingon nga mga ministro nga nagatindog sa pulpito.

¹⁶⁹ Apan paghisgotan na ang bahin sa pagpangtigum sa katapusan na sa dispensasyon, nan ginahulat na lang ang pagkapinadayag sa mga anak sa Dios, sa niana nga dispensa- . . . aron Iyang tigumon ang tanan, tanan nga mga gidala ngadto kang Cristo. Unsa man si Cristo? Pila man . . . Unsaon man nato sa pagpakasulod ngadto Kaniya? Unang Mga Taga-Corinto 12, “Pinaagi sa usa ka Espiritu kitang tanan gibautismohan ngadto sa usa ka Lawas,” nga mao ang Lawas ni Cristo, ug nahimong mga umalambit sa tanang gasa ug tanang maayong butang nga aduna Siya. Husto ba kana? “Ug ang tibuok yuta nagaagulo, nagatuaw, nagahulat sa maong pagkapinadayag sa dihang si Cristo ug ang Iyang Iglesia magahiya na.”

Alang sa . . . usa ka hugna sa kahupnganan sa panahon . . . pagtigum sa tanan . . . sa tanan diha kang Cristo, sa langit, ug sa yuta; ug diha kaniya: . . . yuta; diha kaniya:

Diha usab . . . nahimo kita nga usa ka panulondon, . . .

170 Oh, Igsoong Neville, pasayloa ko sa paggamit niining orasa. Ako . . . kanang pulong nga “panulondon.” Oh-oh-oh-oh! Oh, sigurado gayud! Oh-oh-oh-oh! Nasayod ko nga Siya . . . Kini mao ang akong kabanay’ng Igsoon. Wala ako . . . wala pa unta ako nabuang. Ako—ako—ako gayu’y . . . sa hunahuna ko wala pa man pud. Apan, oh, pagkanindot gayud! Usa ka unsa? “Usa ka panulondon.” Nakaangkon kita og usa ka panulondon. Ingon nga adunay nagbilin og usa ka butang para kanimo. Ang Dios, sa wala pa ang pagkatukod sa kalibutan, aduna pu’y gibilin kanimo. Usa ka ngalan nga nahisulat sa Basahon, aron nga kon patyon na ang Cordero maila pud ka uban Niini. Oh! Igahin na nato kini para unyang gabii. Padayon lang ùsa tà nga magbasa sa makadiyut na lang. Grabe, grabe! Unsaon kaha nato pagdangat sa ika-3 nga bersekulo unyang gabii, o sa ika-3 nga kapitulo diay? Wala pa man gani tà nakahisgot og upat o lima ka bersekulo gikan niini. Karon hapit na kitang mahuman, hinoon, basahon ko lang ùsa kini ug ipadayon kini.

*Nga diha usab nahimo kita nga usa ka panulondon,
nga . . .*

171 Unsa? Unsaon man nato sa pagpakaangkon niini nga panulondon? Giunsa man nato pagkaangkon niini? Tungod ba kay nagkinabuhi kita nga matarung? Unsaon ba nato sa pagpakaangkon niini nga panulondon? Tungod kay gipili na man kitang daan. Amen. Whew! Mga igsoon kong Arminian, nasayod ko nga masakit gayud kana. Wala ko ginatuyo nga makapasakit, pero may nahimo gayud kini nga maayo kanako nga mahibaloan nga kini . . . Inyong—inyong—naangkon man pud ninyo kini, naangkon pud ninyo kini, igsoon, oo. Pero wala lang gyud ninyo nakita kini. Naangkon n’yo gihapon kini bisan pa man. Kita n’yo? Okey man kamo, kita n’yo, okey man kamo. Kita n’yo? Apan, oh, apan pagkaanindot gayud niining palandungon. Oo. Sama lang sa gisulti ni Igsoong Neville mahitungod sa arcade, kagahapon, “Magkuha ka og hagdanan ug susihon mo ug tanawon kung unsay anaa kanimo.” Oo, sir. Mora og ingon niana Kini. Ang Balaang Espiritu sa Dios mao ang atong hagdanan aron masultihan kita kung unsa na’y atong naangkon. Kita n’yo?

172 Kita n’yo na, ang usa ka panulondon. Oh, pagkanindot! “Nga . . .” Unsa man nga matang sa panulondon?

*. . . nga kita gipili-nang-daan sumala sa katuyoan
sa nagabuhat sa tanan nga mga butang sumala sa
pagbulot-an sa iyang kabubut-on:*

173 Kaniadtong Siya’y . . . sa wala pa Siya nahimong usa ka Papa, sa wala pa Siya nahimong Dios, sa wala pa Siya nahimong usa ka Manluluwas, sa wala pa Siya nahimong usa ka Mananambal, sa wala pa kining tanan, Siya’y nagpili-nang-daan, gisulat ang Ngalan sa Cordero diha sa Basahon, og gitang-

aw na pinaagi sa Iyang pagkahibalo-nang-daan ug nakita ang inyong ngalan, og gisulat usab kini didto. Unsa man kini? Ug wala magdugay miabot kita sa kalibutan, natawo sa makasasala nga mga ginikanan; naglaroy-laroy kita sa kalibutan, kabalo na mo. Mahibaloan mo na lang, sama niadtong agilahon'g ilong nga Judiong, si Pablo, kabalo na mo, ug—ug sa dihang may ginatuman siyang buluhaton, ug, sa kalit lang, Adunay miingon, “Dinhi, dinhi, dinhi, dinhi, dinhi!”

Moingon mo, “Oh, Abba, Amahan!”

¹⁷⁴ Ania kita nga hinay-hinay nang nagaabot dinhi, kita n'yo. Gitagana na kitang daan para sa atong panulondon diha Kaniya, nga gitagana-nang-daan para kanato. Kita n'yo, ato na kining napanunod sa wala pa man ang pagkatukod sa kalibutan. Kita n'yo? Oh! Alang sa Iya Mismong katuyoan aron mamatuman ang Kaugalingon Niyang maayo nga kabubut-on, eksakto gayud, ang mahimong usa ka Dios ug Manluluwas.

*Nga kaniya usab sa mingtoo kamo, sa pagkadungog
ninyo sa pulong nga kamatuoran, . . .*

¹⁷⁵ Ug Kinsa man ang Kamatuoran? Si Jesus mao ang Kamatuoran, ang Kamatuoran sa Maayong Balita. Unsa nga Maayong Balita? Adunay usa lamang ka Maayong Balita. Ang Mga Taga-Galacia 1, miingon, “Bisan pa kon ang usa ka Manulonda magawali og lain nga maayong balita, ipatunglo siya.” Kini mao ang Maayong Balita, ang Maayong Balita mahitungod sa inyong kaluwasan; dili nga lahi, og wala na'y lain pa. “Wala—wala na'y laing ngalan sa silong sa Langit nga pinaagi niini kamo mamaluwas.” Kondili sa unsa man nga Ngalan? [Nagaingon ang kongregasyon, “Sa Ginoong Jesus Cristo.”—Ed.] Oh, pagkanindot!

*. . . nga kaniya usab. . . sa mingtoo kamo, gitimrihan
kamo. . .*

¹⁷⁶ Oh, “Human nga kamo nanagpanoo!” Unsaon man nato pagpaspas niini, igsoon? Laktawan na lang sa nato kini para unyang gabii na pud, unsa ma'y ikasulti n'yo? Oh, my! Ako—dili na ko mosaysay pa og—og dugang niini. Laktawan lang sa nato kini para unyang gabii. Pero mora'g dili gayud nako mabiyaan kining pulong nga “naselyohan,” kon giunsa n'yo pagpakasulod dinha, kita n'yo.

¹⁷⁷ Panulondon pinaagi'g pagtagana-nang-daan. Aduna ko'y napanunod. Unsa man nga panulondon? Kinahanglan aduna una og nagbilin kanako og usa ka panulondon. Bueno, moingon mo, “Nagbilin si Jesus kanimo og usa ka panulondon.” Pasayloa ko! Wala diay sukad nagbilin si Jesus og panulondon para kanako, wala pud sukad nagbilin si Jesus og panulondon para kaninyo; igo lang Siyang mikanaug ug nagbayad para sa inyong panulondon, gidala kamo paingon sa inyong panulondon. Tungod ang inyong ngalan nahisulat na man sa Basahon sa

Kinabuhi nga iya sa Cordero sa wala pa ang pagkatukod sa kalibutan. Gihatag na sa Dios kaninyo ang inyong panulondon. Nauna na ang inyong panulondon. Igo na lang mianhi si Jesus . . . Ang kadaghanan, ingon niini ang ginapaningkamotan nila nga isulti bahin niini, “Ang ingon sa Dios, ‘Bueno, daghan kaayong mga tawo ang nangahisalaag. Wala gyud ni usa kanila ang mamaluwas, busa ipadala Ko si Jesus ug tingali Siya’y . . . basin adunay maghinulsol, ug mahibalo sa Akong gibuhat ug mamaluwas.” Oh, kalooy man! Dili ko gayud pagadumalahon nga ingon niana ang akong opisina, bisan pa kon dili gyud ingon ka maayo ang pagdumala ko niini usahay. Kita n’yo? Ako—dili ko gyud buhaton ang ingon niana. Unsa pa kaha ang Dios?

178 Ang Dios, pinaagi sa Iyang pagkahibalo-nang-daan, nakita na Niya mismo kung kinsa ang maluwas ug kung kinsa ang dili maluwas, mao nga gipadala Niya si Jesus aron luwason kadtong mga gipili na Niya. Dili ba miingon man si Pablo, lima ka bersekulo nga nag-una niini, nga “Siya nagpili kanato diha Kaniya bisan sa wala pa og kalibutan kaniadto”? Mao kana ang atong panulondon. Gipili kita sa Dios, ug gipaani Niya si Jesus ug gibayaran ang maong bili. Aron unsa man? Giula Niya ang Iyang Dugo, aron nga walay sala ang pagaisipon nганhi kanato. Nga wala gyud mo’y gibuhat og bisan unsa. Apan kung kamo . . .

179 “Ang nagapakasala sa tinuyo human nga madawat ang kahibalo mahitungod sa Kamatuoran, wala na’y halad tungod sa mga sala.”

180 Karon, ug dinha usab kamo motindog, moingon, “Unsa man kana, Igsoong Branham?”

181 Apan timan-i mismo, kita n’yo, “kadtong nakadawat na sa *kahibalo* mahitungod sa Kamatuoran.” Wala gyud diay nila nadawat ang Kamatuoran, kondili nadawat lang nila ang kahibalo bahin Niini. Kita n’yo? Dili na gayud mahimo alang niadtong mga nalamdagan na unta sa makausa, nahimong mga umalambit sa Espiritu Santo, og nakatilaw na sa maayong Pulong. Sama niadtong mga hangtud utlanan lang nga magtotoo kaniadto. Ngani daghan kaayo ang nagpadala kanako og mga sulat mahitungod niana.

182 Kadtong mga hangtud utlanan lang nga magtotoo kaniadto nanagpanaw man nga hangtud ra didto, pero si Josue ug si Caleb ra ang nakalatas gyud mismo didto. Ngano man? Karon ingnon tà nga ang Espiritu Santo kana, ang maong yuta kaniadto. Ania sila *dinha*. O kaha *dinha*, ingnon tà nga *kini* mao ang Espiritu Santo, ug ania pa sila *dinha* dapit, nakita n’yo. Pero ang saad, ania *dinha*. “‘Bueno, kung magpadala diay sila og napulo ka mga maniniid, usa gikan sa matag banay, aron nga kitang tanan nga mga banay makahibalo gyud kung unsa ang atong panulondon, kon diin gyud ang tanan mapahimutang didtong dapita, kon

diin kita mapahimutang.' Busa, magpadala ako og pipila ka mga maniniid."

¹⁸³ Tuod man nangadto silang tanan didto, "Oh, grabe! Dili. Tawgon na gyud tà nga mga holy-roller, sukad karon. Dili, uh-huh, dili gyud nato mahimo kana." Kita n'yo?

¹⁸⁴ Miingon si Josue ug si Caleb, "Akong tan-awon kung unsa kaha'y hitsura niini." Busa mianhi sila didto ug gitan-aw ang palibot. Aba, nakaabot sila didto sa may ibabaw ug nagputol og usa ka dakung pungpong sa ilang mga ubas ug balik nga mikanaug. Miingon, "Aba, maayo kini, maayo gyud kini! Ania, magdala tà og pipila niini, pagkalami gayud niini!"

¹⁸⁵ "Oh, maayo bitaw kana, apan, oh, pero tan-awa n'yo kadtong dagkung. . . Oh, dili gyud nato mahimo kana. Ang mobarug batok sa tanan nianang dagkung mga denominasyon, og tanan na nianang dagkung mga butang? Oh, subo gayud, dili man nato mahimo kana. Dili gyud, sir! Bisan si kinsa pa man kana, dili gyud nato mahimo. Dili, sir." Ug sugod na silang miingon, "Oh, mangbalik na lang tà ngadto sa mga kolon sa Egipto. Mas maayo pa nga nagpabilin ra tà didto. Dili gyud nato mahimo kini, masigpit kaayo kini nga dalan. Kabalo na man tà nga dili nato mahimo *kini*, dili nato mahimo *kana*."

¹⁸⁶ Miingon si Caleb, "Panghilum mo, kamong tanan!" Miingon pud si Josue, "Paghilum, ang matag usa kaninyo! Tugoti kong isulti ang usa ka butang."

¹⁸⁷ "Oh, alaut, alaut, alaut, dili man nato mahimo kini! Oh, dili gayud nato mahimo. Bueno, kung kinahanglan ko gyud undangan ang akong pagtambong og mga pagdula og baraha, Igsoong Branham! Kung kinahanglan ko gyud pataason ang akong buhok sama sa usa ka tigulang nga babaye, wala na ko kabalo kung unsay akong buhaton. Kung kinahanglan ko gyud nga dili na sul-obon ang akong purol, ako—ako—ako, aba, dili gyud nako mahimo kana, kabalo ka. Ug kung kinahanglan kong undangan ang akong pagpanigarilyo, kung kinahanglan ko mang buhaton kana!" Kamong mga dili maayo nga ehemplo. Oo. "Dili ko gayud mahimo kana."

¹⁸⁸ Miingon si Josue, "Oh, maayo kini. Alleluyah! Makuha nato kini." Unsa man kadto? Nanagtan-aw sila niadtong dagkung mga siyudad nga kinutaan. Pero sila ni Josue ug Caleb mitan-aw ra gyud sa saad nga gihatag sa Dios. Pagpabilin sa Pulong, bisan kinsa man kamo. Pagpabilin gyud sa Pulong!

¹⁸⁹ Kay si Pedro miingon, "Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala, kay ang saad alang kaninyo," (unsa nga Yutang saad?) "ug sa inyong mga anak, ug sa tanang atua sa halayo, bisan ang kapid-an nga pagatawgon sa atong Ginoong Dios."

¹⁹⁰ Dili unta kamo masakitan niini, palihog dili lang gyud unta, sa atong pagtapos. Kita n'yo? Mao man sàb kamong mga Pilgrim Holiness ug mga Nazarene, nakadangat na unta kamo mismo sa pagpabalaan, nakaanhi na mismo sa lugar kon diin inyo na gyud makita ang mga ubas, pero mitalikod hinoon kamo ug namalik. Kita n'yo ang nahitabo? Mao kana ang problema, wala gyud kamo milatas paingon sa maong yuta. Ipakita kanako kon may usa ba ka Nazarene o Pilgrim Holiness, o si kinsa man kanila sa natad sa pagpangmisyong karong panahona, nga nagapahigayon og dagkung mga buluhaton sa pagpang-ayo nga may mga ilhanan ug mga katingalahan nga nabuhat. Ipakita kanako kon duna ba'y usa. Nanagpabilin ra kamo sa Egipto, namalik sa mga kolon sa ahos. Mihunong kamo sa Kadesh-barnea. Tinuod kana.

¹⁹¹ Matikdi, ug ihatag ko kaninyo kung asa gyud kamo, diha sa Mga Hebreohanon sa ika-6 nga kapitulo. “Kay mahitungod niadtong mga nalamdagan na unta sa makausa,” nasayod na gyud mo. Kung wala pa, nan nasayod na mo karon. Kita n'yo? “Ug nahimong mga umalambit, ug nakatilaw na sa Langitnong mga gasa.”

¹⁹² Nakatilaw na unta, kita n'yo. Mosimba ang mga tawo, ug molingkod ug moingon, “Abi nimo, sila—mamahimong husto gyud sila. Kana—kana—mamahimong husto kana. Mahimong mao ra gayud kana, apan sultihan tà ka, aba, nagkinahanglan man gud og dakung pagtoo aron mabuhat kana.”

¹⁹³ “Nakatilaw na sa Langitnong mga gasa, ug giisip ang Dugo sa pakigsaad ingon nga ‘walay bili,’ nga pinaagi niini gibalaan kamo.”

¹⁹⁴ Sama sa usa ka magwawali, gipalakaw siya sa iyang inahan. Ingon siya, “Adunay pagtawag kanako nga mamahimong usa ka alagad sa Ginoo.”

¹⁹⁵ “Sige. Ang unang butang nga buhaton ko ang magalabandera, pinangga, ug paeskwelahan tà ka sa usa ka tulonghaan.” Kana hinoon ang pinakadili maayong butang nga gibuhat niya. Husto kana. Tungod wagtangon man nila ang tanan-tanan gikan sa maong batan-ong lalaki nga ginapaningkamotan nga ipahimutang unta sa Dios kaniya. Dayon, karon matikdi.

¹⁹⁶ “Kay kung magpakasala kita sa tinuyo, magpakasala sa tinuyo human nga madawat nato ang kahibalo sa Kamatuoran, ang kahibalo. Tan-awa n'yo kini sa Kasulatan ug hibaloa nga ang Biblia nagaingon nga Siya mao sa gihapon kagahapon, karon, ug hangtud sa kahangturan. Tan-awa n'yo Kana, ingon nga mao ang kahibalo sa Kamatuoran. Ang makita kini, pero gitalikdan ra nato, ug giisip ang Dugo sa pakigsaad. . . .”

¹⁹⁷ Moingon ang usa ka tawo, “Oh, oo, nagatoo man ko sa—sa Dios.” Maayo, gihimo mo na ang unang lakang.

198 “Oo, nagatoo pud ko sa pagpabalaan.” Okey, anaa ka na sa utlanan, dinhi mismo diin andam na unta nga madawat ang Espiritu Santo. Pero nagduhaduha ka pa ug miingon, “Ako—ako—wala ako kahibalo mahitungod niana. Kung kinahanglan ko gyud manglihok nga sama... Dili na. Wala ko kahibalo. Kabalo ba ka kung unsay tawag nila niana nga mga tawo? Uh-huh, wala ako mahibalo kon madawat ko ba kana o dili. Dili, siguro magpadayon na lang ko ug magpamiyembro sa...?...” Kita n’yo? Kita n’yo?

199 Ug kabalo ba mo kung unsay mahitabo? Siya miingon, “Imposible gayud nga makasulod pa sila.” Gipalagpas na man nila ang ilang adlaw sa grasya. Mao kana’y gisulti sa Biblia. Kabalo ko nga masakit kana, apan miingon man ang Biblia, “Nakatilaw na sa Langitnong mga gasa, ug giisip ang Dugo sa pakigsaad nga...”

200 Moingon sila, “Nagatoo ako sa pagpabalaan, sa usa ka maayo, mahinlo, og balaan nga pagkinabuhi.”

201 Tinuod bitaw, pero kamo, sa dihang nakita na ninyo ang bautismo sa Espiritu Santo, ug ang bautismo ug tanan na niining uban pang mga butang sa Biblia, ug unsa ma’y gibuhat ninyo? Inyong giisip ang Dugo sa pakigsaad nga nagbalaan kaninyo, ingon nga “walay bili.” Unsa ba ang nagdala kaninyo dinha, higala? Unsa...?... Unsa ba diay ang nagpugong kaninyo nga mamahimong usa ka dautang makasasala? Unsa ba diay ang nagwagtang sa sala sa inyong kinabuhi, ug sa pagpanigarilyo ug paghubog-hubog, ug mga pamba-babaye ug mga ingon-anang butang sa inyong kinabuhi, nga dili gayud angay’ng maanaa dinha? Unsa man diay ang nagbuhat niana? Ang Dugo sa pakigsaad! Dayon nakadangat kamo nga haduol na gayud unta aron nga makatilaw sa mga ubas gikan sa pikas Yuta, pero gikaulaw man ninyo ang Maayong Balita, nangahadlok mo tungod sa inyong denominasyon! Malooy unta kaninyo ang Dios! Oo, sir. “Giisip ang Dugo sa pakigsaad ingon nga ‘walay bili,’ ug nagpanamastamas sa mga buhat sa grasya. Imposible nga makasulod pa siya sa maong Yuta.”

202 Unsa ba ang nahitabo? Pangutan-on ko kamo. Bueno, usa man ako ka tigtipo, ug ang si kinsa man nga nasayod sa Biblia usa pud ka tigtipo. Duna ba’y usa niadto nga mga tawo ang nakadangat didto sa yutang saad? Wala ni usa kanila. Si kinsa ra man ang nakahimo, si kinsa man ang nakadangat didto? Kadtung mga una nga miadto, nga mibalik ug miingon, “Makuha nato kini, maangkon nato ang Espiritu Santo tungod kay mao man ang gisulti sa Dios! Miingon si Pedro sa Adlaw sa Pentecostes, kung ako ‘maghinulsol ug magpabautismo sa Ngalan ni Jesus Cristo,’ madawat ko ang Espiritu Santo, og ang saad alang kanako. Andam ako nga buhaton kini. Akoa, akoa na ang saad.” Nasabtan n’yo ba? “Karon akoa na ang saad.

Nadawat ko na kini, akoa na kini. Tinuod gayud.” Sila lang lamang kadto.

203 “Oh,” moingon mo, “pero, Igsoong Branham, sa pagkabanhaw na!” Dili man sila mamaatua didto. “Oh, dili diay?” Dili, sir. Ang ingon ni Jesus.

204 Miingon sila, “Ug ginahimo Mo ang Imong Kaugalingon nga ingon ka gamhanan sama ni Moises, ug miingon Ka nga Ikaw, nga Imong ‘nakita si Abraham.’” Ug ingon pa niya, “Ug—ug—ug—ug dugay nang patay si Abraham! Aba, wala Ka pa—wala Ka pa man gani milagpas sa singkwenta anyos ang pangidaron, ug miingon Ka nga nakita Mo si Abraham?”

205 Miingon Siya, “Sa wala pa si Abraham, MAO NA AKO.” Oh, my! Ang “AKO MAO,” ang kanunay’ng kasamtangan, Eternal nga Dios. Dili nga kagahapon, dili sa ugma, “AKO MAO.” Kita n’yo? Ang kanunay’ng kasamtangan nga Dios, ang Elohim, “AKO MAO.” Dayon namudyot sila og. . . Patyon na unta nila Siya kaniadto.

206 Ingon niya, “Bueno, ang among mga ginikanan nanagpangaon man og manna didto sa kamingawan sulod sa kuwarenta ka tuig. Nagpaulan ang Dios og tinapay gikan mismo sa Langit ug gipakaon sila. Nagasimba sila ug mga buutan sila nga miyembro sa simbahan sulod sa kuwarenta ka tuig. Namatay gani ang akong Mama dinhi mismo niini nga simbahan,” ug tanan nang ingon niana. “Ang akong mga ginikanan nanagpangaon og manna didto sa kamingawan sulod sa kuwarenta ka tuig.”

207 Ug ingon si Jesus, “Ug sila ang matag usa kanila nangamatay.” Ang *pagkamatay* nagakahulogan og “Walay Katapusan nga pagkahimulag.” “Sila ang matag usa kanila nangamatay. Apan Ako nagaingon kaninyo, nga Ako mao ang Tinapay sa Kinabuhing nga gikan sa Dios sa Langit. Ang tawo nga nagakaon niini nga Tinapay nga iya sa Espiritu, aduna siya’y Kinabuhing Walay Katapusan ug dili na siya mamatay pa. Ug banhawon Ko siya sa kaulahiing adlaw.” Oh, igsoon, dili ba Siya kahibulongan?

Isn’t He wonderful, wonderful, wonderful?
 Isn’t Jesus our Lord wonderful?
 Eyes have seen, ears have heard, what’s
 recorded in God’s Word;
 Isn’t Jesus our Lord wonderful?

208 Husto ba? Nakita na nato ang Iyang nagapang-ila nga Espiritu nga nagapataliwala kanato. Nakita na nato Siya nga namuhat og mga milagro ug mga ilhanan ug mga katingalahan. Nadungog na nato Kini nga nahisulat dinhi mismo sa Pulong, nakita n’yo na Kini nga napanghimatud-an dinha mismo. Oh, my!

Eyes have seen, ears have heard, what's
 recorded in God's Word;
 Isn't Jesus my Lord wonderful?

209 Sa sunod nga duha ka minuto, o tulo, adunay panerbisyo sa pagbautismo sa tubig nga igapahigayon dinhi. Ug karon kadtong mga pagabautismohan, ang mga kababayen-an moanhi *dinhi* dapit, ug ang mga kalalaken-an pud dinhi *niining* dapita. Ug karon ang mga kalalaken-an sa akong wala, *dinhi* niining dapita. Ug ang mga kababayen-an pud *dinhi*. Anaay mga igsoong babaye dinha nga may giandam na nga mga sinina. Ug kung duna ma'y lalaki o babaye nga ania niining buntaga, nga kumbinsido gayud nga nagatoo kamo sa Pulong sa Dios, ug nagatoo kamo nga ginatuman sa Dios ang Iyang saad, nga kung ang usa ka tawo bug-os gayud nga maghinulsol sa tanan niyang mga sala . . . Karon, wala pa'y unsa mang gihimo ang Dugo. Wala pa, ang inyo pa lang kanang pagtoo sa Dios. Ug nagatawag ang Dios, nga, "Phew, phew, phew!" ginatawag kamo, mao kana'y ginabuhat niini karon, "Phew, phew!"

"Wala pa ako nabautismohan."

"Phew, phew!"

"Bueno, bueno, kung makasugod lang unta ako ug mamuhat og lahi."

"Phew!" Kana, ingon na niana, ang pagsugod, dayon—dayon lahi na ang inyong ginabuhat human nga makasugod kamo. Kita n'yo? Kinahanglan n'yong talikdan, og magsugod, kita n'yo.

Moingon mo, "Bueno, ako—ako—wala ko pa nakita kini nga ingon niana."

210 Bueno, minahal nga igsoon, gusto kong ipakita mo kanako ang usa ka Kasulatan kon diin ang si kinsa man . . . traynta'y-uno ka tuig na sa ministerio ko sa tibuok kalibutan nga ginahagit ko kini, sa atubangan sa mga obispo ug uban pa, kon diin duna ba'y usa ka tawo, usa ka tawo ang nabautismohan sa unsa mang uban pa nga paagi gawas sa Ngalan ni Jesus Cristo. Ug ang matag usa nga wala nabautismohan sa Ngalan ni Jesus, kinahanglan nga moduol ug magpabautismo pag-usab sa maong Ngalan.

211 Ang Dios adunay usa lamang ka Ngalan, ug ang Iyang Ngalan mao si Jesus. Mao kana ang Iyang Anak, ginadala Niya ang Ngalan sa Iyang Anak. Ang Dios! Bueno, si Jesus, ang lawas kaniadto usa ka tawo. Nasayod kita niana. Mao kadto ang Anak sa Dios nga gilandongan. Karon wala kita nagatoo sa pang-oneness nga tipo, ang maong mga tawo nga nagaingon nga ang Dios kono sama ra sa inyong tudlo. Hinoon nagatoo kita nga dunay tulo ka kina- . . . mga kinaiyahan sa Dios. Tulo ka kinaiyahan sa Dios, diin napadayag ang Dios. Apan adunay usa ra ka Dios. Kita n'yo? Mao gayud. Wala kita nagatoo . . . Nagatoo kita sa usa ka—sa usa ka . . . Isulti ko kini nga ingon

niini, nagatoo kita nga nagpuyo ang Dios diha sa tulo ka opisina. Aduna Siya kaniadtong og usa ka opisina sa yuta.

212 Karon, kamong mga kababayan-an duol mo dinhi *niini* nga bahin, ug kamong mga kalalaken-an pud duol mo dinhi *niini* nga bahin, ang mga nakaandam na. Ug nagaandam na sila karon para sa panerbisyo sa pagbautismo.

213 Ug, bueno, ang Dios adunay tulo ka opisina. Ang usa niini gitawag nga pagka-Amahan, o ang dispensasyon sa Amahan; ang laing usa gitawag nga pagka-Anak; ug ang usa pa gitawag nga Espiritu Santo. Bueno, sa karong panahon, sa unsa—unsa man nga dispensasyon nagapamuhat ang Amahan sa niini nga panahon? [Nagaingon ang kongregasyon, “Espiritu Santo.”—Ed.] Espiritu Santo. Unsa man Siya sa kaniadtong mga nangaging panahon? [“Jesus.”] Jesus. Unsa man Siya niadtong mga panahon sa wala pa kana? [“Amahan.”] Apan usa ra gayud kadto ka Dios! Husto ba? Siya’y Amahan, Anak, ug Espiritu Santo, kana ang tulo, kana ang tulo ka opisina sa usa ra ka Dios. Usa ra ka Dios!

214 Apan, ang *Amahan* dili man usa ka ngalan, husto ba? Gusto kong pangutan-on kamo. Karon buut kong ihatag kaninyo ang Mateo 28:19, kon diin miingon si Jesus, “Busa panglakaw kamo, tudlo-i ang tanang kanasuran, og bautismohan sila sa Ngalan,” (N-g-a-l-a-n) “Ngalan sa Amahan . . .”

215 Karon gusto kong masayran kung unsa gayud kamo ka nahibalo sa Kasulatan. Sultih ra ko ninyo kon medyo mitipas ko. Ug Siya miingon kanila, “Panglakaw kamo sa tibuok kalibutan, ug iwali ang Maayong Balita sa tanang binuhat. Ang nagatoo ug nabautismohan maluwas. Ang dili nagatoo pagahukman sa silot. Kini nga mga ilhanan maganunot kanila nga nagatoo. Sa Akong Ngalan pagahinginlan nila ang mga yawa,” Tinuod ba kana tanan? “magasulti og mga bag-ong sinultihan, makakupot og mga bitin.” Karon hisgotan ko usa para kaninyo, ang Mateo . . .

216 Karon paminaw mo. Ginahangyo ko ang si kinsa man nga magsasaysay. Bueno nakarekord man kini sa mga teyp, og nagaabot kini sa tibuok kalibutan. Ginahangayo ko ang si kinsa man nga magsasaysay nga moduol kanako ug dalhon kanako ang unsa man nga teksto sa Kasulatan, ang unsa man nga teksto sa . . . o dili Kasulatan, ang unsa man nga teksto sa Kasulatan o unsa man nga kasaysayan, unsa man nga bersekulo sa kasaysayan nga nagapakita nga dunay si kinsa mang Protestante, o kaha dunay si kinsa man nga gikabautismohan sa ngalan nga “Amahan, Anak, Espiritu Santo,” hangtud kaniadtong giordena na kini sa Katoliko didto sa Konseho sa Nicea. Karon nakarekord kini sa mga teyp, mokaylap kini sa tibuok kalibutan, og pagahubaron kini ngadto sa traynta’y-siete ka nagkalainlaing mga pinulongan. Ako pa ang magbayad sa inyong pamasaha patabok sa kadagatan.

Tinuod kana. “Ang Amahan, Anak, ug Espiritu Santo” usa gayud ka mini, dili-tinuod nga dogma sa Katoliko, ug dili usa ka Cristohanong bautismo. Husto! Gidala kana ni Luther gikan sa iglesiang Katoliko, uban ang katekismo, gigamit pud kana ni Wesley ug nagpadayon na. Apan kini na man ang panahon sa pagkapinadayag sa mga anak sa Dios, sa diha nga igapadayag na ang mga tinago nga dugay nang gililong sukad pa sa pagkatukod sa kalibutan. Mao na kini nga panahon. Mao gayud.

²¹⁷ Hinumdumi n’yo, nga wala gyud sukad og usa ka tawo sa Biblia ang gikabautismohan sa ngalan nga “Amahan, Anak, Espiritu Santo.” Sulod sa tulo ka gatus ka tuig hangtud na sa pagkamatay sa kaulahiang apostoles, wala gyu’y ni usa nga nabautismohan sa ngalan nga “Amahan, Anak, Espiritu Santo.” Aduna sila’y. . . Nabasa na nako pareho ang *Pre-Nicene Fathers, The Nicene Council*, ug gikan diay dinha nag-organisa sila og ginatawag nila nga “pangtibuok-kalibutan nga iglesiang Cristohanon” ug nagtukod og organisasyon gikan niana ug gipugos ang tanang mga tawo ngadto niana, nga mao ang iglesiang Katoliko. Tungod ang mismong pulong nga *katoliko* nagakahulogan man og “pangtibuok-kalibutan,” usa ka pangtibuok-kalibutan nga iglesiang Cristohanon, pangtibuok-kalibutan, usa ka iglesia nga maglangkob sa tibuok kalibutan. Ug sa niini nga Cristianismo, ginapugos nila ang mga tawo ngadto niini. Dinha gigamit nila, giwala nila si Venus ug giilis si Maria. Giwala nila si Pablo. . . o si Jupiter, ug giilis si Pablo. Pagano gihapon kana! Tinuod. Dinha naggikan ang iglesiang Katoliko, ug human sa lima ka gatus ka tuig. . .

²¹⁸ Ngani aduna sila’y ginapasalida karon sa Louisville, nga *Ben Hur*. Nagpasalida pud sila og *Ten Commandments* dili pa lang dugay. Unta maghimo pa sila og usa ka salida, kung mahimo nila, mahitungod sa kinse ka gatus ka tuig nga mangitngit nga kapanahonan. Nanghinaut ko nga ipasalida pud nila ang mahitungod niana. Kinse ka gatus ka tuig nga paganhong pagpanglutos, kaniadtong gipangpugos nila ang tanan ug gipamatay sila, gipangpuo sila, gipangbitay sila. Ginahikot ang ilang usa ka kamot ngadto sa usa ka baka ug ang usa pa ka kamot ngadto pud sa usa ka baka, ug pahalokon sila sa krusipiho kay kung dili sila mohalok nan sugdan nang padaganon ang usa ka baka paingon niini nga direksyon o paingon niana nga direksyon. Gisandig ko ang akong kamot, didto mismo sa Switzerland, luyo niadtong mga poste kon diin sila kaniadto patindog nga gigapos ug ginaputol ang ilang mga dila ug gipangbansagan sila nga mga balbal kono ug tanan nang uban pa. Tinuod gayud kana. Mismo!

²¹⁹ Ang kadtong mao ra nga espiritu anaa gihapon sa karong panahon. Ang balaod lang ang nagababag niana. Pero hulata n’yo pagmakalingkawas kana. Mao ma’y gisulti sa Biblia. Hulata n’yo lang hangtud nga puede na niyang ipakita ang mga kolor

niya, pagmagkaaduna na siya og kahigayonan. Tingali'g siya na ang inyong botaran sa dili madugay, wala lang ko kahibalo. Kita n'yo? Moabot kana, moabot gyud kana. Wala ma'y paagi nga mapugngan kana. Siguradong moabot kana. Husto. Siguradong moabot gyud kana, taliabot na kana. Ug sa diha nga moabot na kana, magbantay gyud mo. Apan, igsoon, gusto n'yong masayran kining usa ka butang, nahibalo ko kung kang Kinsa ako nagatoo. Alleluyah! Magpadayon lang. Kita n'yo. Mao gyud.

²²⁰ Dunay higayon sa diha nga ang—sa diha nga ang magsusulat, sa dihang akong gisultihan ang magsusulat sa Lam- . . . Lamsa—Lamsa nga Biblia, niadtong pagtan-aw niya ug nakita kadtong karaang ilhanan sa Dios, nga ingon gayud ka eksakto, dunay tulo ka gagmay'ng tuldok niini, ingon ko, “Unsa man kana?”

Ingon siya, “Ang Dios kana diha sa tulo ka kinaiyahan.”

Ingon ko, “Sama ba sa Amahan, Anak, ug Espiritu Santo?”

Mitan-aw siya kanako. Ingon siya, “Nagatoo ba ka niana?”

Ug ingon ko, “Oo, sir.”

²²¹ Ingon siya, “Sa nakita ko kadtong pagpang-ila niadtong miaging gabii, nahunahuna ko nga usa ikaw ka propeta sa Ginoo.” Miingon, “Panalanginan sa Dios ang imong kasingkasing.” Gigakus ko niya, og miingon, “Karon kabalo ko nga mao gyud kana.” Ingon pa siya, “Kining mga Amerikano wala gayud kahibalo kung unsa.” Miingon, “Wala gyud sila'y unsa man nga hingsayran.” Miingon, “Gapaningkamot silang mogamit og usa ka pang-Sidlakan nga Basahon ug maghimo og usa ka pang-Kasadpan nga Basahon gikan Niini. Wala gyud sila'y nahibaloan sa ilang Biblia.” Ingon pa siya, “Wala na'y laing Ngalan sa silong sa Langit, wala na'y ubang Ngalan, kay ang tanan gibautismohan man sa Ngalan ni Jesus Cristo. Wala gyu'y ingon nianang butang nga tulo ka persona sa usa ra ka Dios.” Ug si Igsoong Lamsa kadto, si Doktor Lamsa, ang maghuhubad sa Lamsa nga Biblia, nga usa ka suod nga higala ni Eisenhower ug sa tanang diplomata sa kalibutan, ug tanan nang uban pa, iya akong gigakus, miingon, “Sa umaabot nga adlaw pusilon ka nila tungod niana. Apan,” ingon pa, “hinumdumi lang, nga namatay kadtong tanan nga mga tawo alang sa usa ka katuyoan.”

²²² Gusto kong mamahimong sama sa luoy'ng si Pedro kaniadtong gibilanggo na siya. Aduna ma'y usa ka batan-ong lalaki didto ug ginerbiyos kadto og ayo. Ug miingon si Pedro, “Oh, unsa ma'y problema?”

Miingon, “Kabalo ba ka nga pagapatyon ka na?”

Ingon si Pedro, “Oo.”

Miingon ang batan-ong lalaki, “Bueno, hapit na man kang mamatay karon.”

Ingon siya, “Oo.”

Ingon niya, “Bueno, sila’y—sila’y . . . wala ba ka mahadlok?”

Ingon siya, “Wala.”

Ingon niya, “Usa gyud siguro ka kanila nga ginatawag nilang mga Cristohanon.”

Ingon siya, “Oo.”

Miingon, “Unsa ma’y nahitabo?”

²²³ Ug iyang gisuginlan ang maong batan-on, milingkod siya ug gisulti kaniya ang maong estorya. Ug samtang nagpadayon kadto, sa katapusan, miingon siya, “Ug gawasnon man unta ko karong buntaga. Mahimo man ako nga moadto ug magpamiyembro sa pipila sa ilang mga denominasyon ug magpadayon na lang sa pagkinabuhi, kita mo. Gawasnon na unta ako. Apan pagawas na nako kaniadto sa ganghaan sa siyudad, ug nakita ko ang Usa nga nagaabot, nagaduol. Naila ko mismo kung Kinsa Siya. Miingon ko, ‘Ginoo, asa Ka man paingon?’ Ingon Siya, ‘Mobalik Ako aron mailansang pag-usab.’” Miingon, “Mobalik ra Ako.”

²²⁴ Niadtong tungora mismo miingon na sila, “Si kinsa ba ang ginganla’g Simon Pedro?”

Miingon, “Ania ako!”

Miingon, “Andam na kami kanimo.”

Miingon, “Nagahulat pud ko kaninyo.” Milakaw na pagawas.

²²⁵ Gipikpik siya niadtong maong batan-on diha sa abaga, ug miingon, “Kadali lang, Simon; ginadawat ko usab kana nga Dios! Ug karon wala na ako mahadlok; bisan ako na ang sunod.” Tinuod kana. Alleluiah!

Keeps . . . It’s dripping with blood, yes, it’s
dripping with blood,
This Holy Ghost Gospel is dripping with blood,
The blood of disciples who died for the Truth,
This Holy Ghost Gospel keeps dripping with
blood.

The first one to die for this Holy Ghost plan,
Was John the Baptist, but he died like a man;
Then came the Lord Jesus, they crucified Him,
He preached that the Spirit would save men
from sin.

There’s Peter and Paul, and John the divine,
They gave up their lives so this Gospel could
shine;
They mingled their blood, like the prophets of
old,
So the true Word of God could honest be told.

There's souls under the altar, crying, "How long?"
 For the Lord to punish those who've done wrong; (Paminaw!)
 But there's going to be more who'll give their life's blood
 For this Holy Ghost Gospel and its crimson flood.
 It's dripping with blood, yes, it's dripping with blood,
 This Holy Ghost Gospel it's dripping . . . blood,
 The blood of disciples who died for the Truth,
 This Holy Ghost Gospel is dripping with blood.

226 Usa na lang ka Kasulatan adisir kita manguli:

. . . ug nanag-ingon sila kang Pedro ug . . . sa uban pa kanila, Mga igsoon, unsa ma'y among pagabuhaton aron maluwas?

. . . si Pedro miingon kanila, Maghinulsol kamo, ang matag usa kaninyo ug magpabautismo sa Ngalan ni Jesus Cristo alang sa kapasayloan sa inyong sala, ug madawat ninyo ang gasa nga Espiritu Santo.

Kay ang saad alang kaninyo, ug sa inyong mga anak, ug sa tanan nga atua sa halayo, bisan ang kapid-an nga pagatawgon sa atong Ginoong Dios.

227 Panalanginan kamo karon sa Ginoo. Samtang nagapanggawas na kita, puede ra kamong magtan-aw sa bautismo samtang kita . . . ? . . .



PAGSAGOP 3 CEB60-0522M

(Adoption 3)

SERYE SA PAGSAGOP

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Mayo 22, 1960, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org